

五代史

紀一之十二

一之十三



五の六三
六の六三
木大

内閣文庫	
番號	漢 5063
冊數	6 (1)
函號	281 13

281-13



第一本

梁九十三卷

一 太祖 朱全忠

二

三 末帝 友貞

四 唐 莊宗

五

六 明宗 嗣源

七 愍帝 從厚
廢帝 從珂

八 晉 高祖 石敬瑭

九 出帝 重貴

十 漢 高祖 劉暉
隱帝 承祐

十一 周 太祖 郭威

581-185

十二 世宗 恭帝 宗訓

三 梁家人傳

太祖文惠皇后王氏 元貞皇后張氏 陳昭儀 李昭容
 末帝妃張氏 妃郭氏 太祖子友裕 友珪 太祖子友裕
 友雍 友徽 友攷 友文 兄全昱 全昱子友諒
 友能 友誨 兄存子友寧 友倫

五代史記序

孟子曰三代之得天下也以仁其失天下也以不仁自生民以來
 治一亂旋相消長未有去仁而興積仁而亡者甚哉五代不仁
 之極也其禍敗之復殄滅剝喪之威亦其效耳夫國之所以存者
 以有民民之所以生者以有君方是時上之人以慘烈自任刑戮
 相高兵革不休夷滅構禍置君猶易吏變國若傳舍生民膏血塗
 草野骸骼暴原隰君民相跡如髦鬣草木幾何其不胥為夷也逮
 皇天悔禍真人出寧易暴以仁轉禍以德民咸保其首領收其族
 屬各正性命豈非天邪方夷夏相蹂兵連亂結非無忠良豪傑之
 士竭謀單智以緩民之死乃埋沒而無聞矣否閉極而泰道升聖
 人作而萬物覩指揮中原兵不頓刃向之滔天巨滑搖毒煽禍以
 害斯人者蹈鼎鑊斧鑕之不暇豈非人邪天與人相為表裏和同



於無間聖人知天之所助人之所歸國之所恃以爲固者仁而已
非特三代然也堯舜之盛漢唐之興秦隋之失魏晉之亡南北之
亂莫不由此也五代距今百有餘年故老遺俗往往垂絕無能道
說者史官秉筆之士或文采不足以耀無窮道學不足以繼述作
使五十有餘年間廢興存亡之迹奸臣賊子之罪忠臣義士之節
不傳於後世來者無所攷焉惟廬陵歐陽公慨然以自任蓋潛心
累年而後成書其事迹實錄詳於舊記而褒貶義例仰師春秋由
遷固而來未之有也至於論朋黨宦女忠孝兩全義子降服豈小
補哉豈小補哉

建安陳師錫

歐陽修五代史記凡七十四篇總七十四卷

本紀十二卷 梁三卷 漢一卷 唐四卷 周二卷 晉三卷

列傳四十五卷 梁家八卷 唐家八卷 晉家八卷 漢家八卷 周家八卷 梁臣三卷 唐臣三卷 晉臣三卷 漢臣三卷 周臣三卷 死節一卷 行事一卷 唐臣一卷 晉臣一卷 梁臣一卷 唐臣一卷 雜傳九卷

司天職方考三卷 司天二卷 職方一卷

世家年譜十一卷 吳一卷 南唐一卷 前蜀一卷 後蜀一卷 南漢一卷 楚一卷 以上年譜一卷

四夷附錄三卷

徐無黨注

皇明崇禎三年歲在尚章訖
公祥且月望日琴川毛氏開雕

毛氏

五代史目錄

本紀一十二卷

列傳四十五卷

考三卷

世家年譜一十一卷

附錄三卷

徐無黨注

本紀

第一卷

第一本

梁本紀第一

太祖上

朱全忠

開平四年

乾化二

凡五年

第二卷

梁本紀第二

梁代凡十六年

太祖下

第三卷

梁本紀第三

末帝 友貞 乾化之餘二 貞明六 龍德三 凡十一年

第四卷

唐本紀第四

莊宗上 李存勖 同光四 凡四年

第五卷

唐本紀第五

莊宗下

第六卷

唐本紀第六

唐本紀第六卷
此卷與前卷正誤記

明宗 嗣源 天成四 長興四 凡七年

第七卷

唐本紀第七

愍帝 從厚 應順一 凡一年

廢帝 從珂 清泰三 凡二年

第八卷

晉本紀第八

高祖 石敬瑭

第九卷

晉本紀第九

出帝 重貴

第十卷

五代史目錄

漢本紀第十

高祖 劉高

隱帝 承祐

第十一卷

周本紀第十一

太祖 郭威

第十二卷

周本紀第十二

世宗 柴

恭帝 宗訓

列傳

第十三卷

文惠惠腸母序

梁家人傳第一

太祖文惠皇后王氏

元貞皇后張氏

陳昭儀

李昭容

末帝妃張氏

妃郭氏

太祖子友裕

友珪

友璋

友雍

友徽

友孜

友文

兄全昱

全昱子友諒

友能

友誨

兄存子友寧

友倫

第十四卷

第二本

唐太祖家人傳第二

太祖劉太妃

貞簡皇后曹氏

莊宗神閔敬皇后劉氏

淑妃韓氏

德妃伊氏

太祖子存美

存霸

存禮

存渥

存乂

存確

存紀

太祖弟克讓

克修

克修子嗣弼

嗣肱

克恭

克寧

克寧子壤

莊宗子繼岌

繼滄

繼嵩

繼蟾

繼巽

第十五卷

唐明宗家人傳第三

明宗和武憲皇后曹氏

昭懿皇后夏氏

宣憲皇后魏氏

淑妃王氏

愍帝哀皇后孔氏

明宗子從璟

從榮

從益

姪從璨

從璋

從溫

從敏

第十六卷

唐廢帝家人傳第四

皇后劉氏

子重吉

重美

第十七卷

晉家人傳第五

高祖皇后李氏

太妃安氏

出帝皇后馮氏

高祖子重信

重乂

重英

重進

重睿

重杲

高祖叔父萬友

萬友子敬威

敬贊

萬銓

萬銓子敬暉

高祖兄敬儒

高祖弟敬德

敬殷

重胤

出帝子延煦

延寶

第十八卷

漢家人傳第六

高祖皇后李氏

高祖弟崇信

高祖子承訓

承勳

姪贊

第十九卷

周太祖家人傳第七

聖穆皇后柴氏

淑妃楊氏

貴妃張氏

德妃董氏

子侗

信

姪守愿

奉超

遜

第二十卷

周世宗家人傳第八

柴守禮

宣懿皇后符氏

世宗子誼

誠

熙謹

第二十一卷

梁臣傳第九

敬翔

李唐賓

世宗貞惠皇后劉氏

後立皇后符氏

誠

熙讓

熙誨

凡九人 一人附

朱珍

龐師古

唐賓附于朱珍

梁臣凡三卷

葛從周

張存敬

劉捍

第二十二卷

梁臣傳第十

康懷英

牛存節

張歸霸 歸厚 歸弁

王重師

第二十三卷

梁臣傳第十一

楊師厚

霍存

符道昭

寇彥卿

劉鄩

徐懷玉

王景仁

五代史目錄

六

賀瓌

王檀

馬嗣徽

王虔裕

謝彦章

第二十四卷

唐臣傳第十二

郭崇韜

安重誨

第二十五卷

唐臣傳第十三

周德威

符存審

史建瑭子匡翰

王建及

元行欽

安金全

袁建豐

西方鄴

第二十六卷

唐臣傳第十四

符習

烏震

孔謙

張延朗

李嚴

李仁矩

毛璋

第二十七卷

唐臣傳第十五

朱弘昭馮贇附

劉延朗

康思立

康義誠

藥彥稠

第二十八卷

第三本

晉臣凡一卷

唐臣傳第十六

豆盧革

盧程

任園

趙鳳

李襲吉

張憲

蕭希甫

劉資

何瓚

第二十九卷

晉臣傳第十七

桑維翰

景延廣

吳巒

漢臣凡一卷

第三十卷

漢臣傳第十八

蘇逢吉

史弘肇

楊邠

王章

劉銖

李業

聶文進

後贊

郭允明

第三十一卷

周臣傳第十九

王朴

鄭仁誨

扈載

第三十二卷

死節傳第二十

王彥章 梁

裴約 附 梁

周臣凡一卷

劉仁贍附南唐

第三十三卷

死事傳第二十一

張源德

夏魯奇

姚洪

王思同

張敬達

翟進宗

沈斌

王清

史彥超

孫晟

第三十四卷

一行傳第二十二

鄭遨

張薦明

石昂

程福贊

李自倫

第三十五卷

唐六臣傳第二十三

張文蔚

楊涉

張策

趙光逢

薛貽矩

蘇循杜曉附

第三十六卷

義兒傳第二十四

李嗣昭

嗣本

嗣恩

存信

存孝

存進

存璋

存賢

第三十七卷

伶官傳第二十五

敬新磨

史彥瓊

第三十八卷

宦者傳第二十六

張承業

第三十九卷

雜傳第二十七

王鏐

王處直

第四十卷

五代史目錄

六

景進

郭從謙

張居翰

羅紹威

劉守光

雜傳第二十八

李茂貞

李仁福

楊崇本

溫韜

第四十一卷

雜傳第二十九

盧光稠

雷滿

趙匡凝

第四十二卷

雜傳第三十

第四本本

韓建

韓遜

高萬興

譚全播

鍾傳

朱宣

王師範

孟方立

趙犍

第四十三卷

雜傳第三十一

李振

韋震

孫德昭

蔣殷

氏叔琮

第四十四卷

瑾

李罕之

王珂

馮行襲

李彥威

裴廸

孔循

王敬堯

丁會

閻寶

康延孝

劉知俊

賀德倫

張全義

袁象先

段凝

周知裕

朱友謙

朱漢賓

劉玘

陸思鐸

第四十五卷

雜傳第三十三

第四十六卷

雜傳第三十四

陸思鐸

趙在禮

房知温

安重霸

康福

第四十七卷

雜傳第三十五

華温琪

張筠 弟篋

李周

李承約

相里金

馬全節

霍彦威

王晏球

王建立

郭延魯

郭延魯

裴從簡

楊彥詢

劉處讓

張希崇

張廷蘊

皇甫遇

安彦威

劉景巖

第四十八卷

雜傳第三十六

盧文進

楊思權

劉審交

高行周 行珪

白再榮

第四十九卷

雜傳第三十七

翟光鄴

李瓊

李金全

王弘贊

王周

安叔千

馮暉

皇甫暉

唐景思

王進

常思

孫方諫

第五十卷

雜傳第三十八

王峻

王殷

劉訶

王環

析從阮

第五十一卷

雜傳第三十九

朱守殷

董璋

范延光

婁繼英

安重榮

安從進

楊光遠

第五十二卷

雜傳第四十

杜重威

李守貞

張彥澤

第五十三卷

雜傳第四十一

王景崇

趙思綰

慕容彥超

第五十四卷

雜傳第四十二

第五本

馮道

李琪 兄擬

李愚

司空類

第五十五卷

雜傳第四十三

劉昫

馬胤孫

劉岳

盧損

崔稅

第五十六卷

鄭珏

盧導

盧文紀

姚顛

馬縞

崔侏儉

李譯

雜傳第四十四

和凝

馮玉

呂琦

何澤

史珪

第五十七卷

雜傳第四十五

李崧

賈緯

張允

裴皞

趙瑩

盧質

薛融

王權

龍敏

李鱗

段希堯

王松

王仁裕

裴羽 王延
馬重績 趙延義

考

第五十八卷

司天考第一

第五十九卷

司天考第二

第六十卷

職方考第三

世家年譜

第六十一卷

吳世家第一

第六十二卷

第六本

南唐世家第二

李昇 子景 景子煜

第六十三卷

前蜀世家第三

王建 子衍

第六十四卷

後蜀世家第四

孟知祥 子昶

第六十五卷

南漢世家第五

劉隱 弟襲 襲子玠 玠弟晟 晟子銀

第六十六卷

楚世家第六

馬殷 子希聲 希聲弟希範 希範弟希廣
其臣劉言 王逵 周行逢 附

第六十七卷

吳越世家第七

錢鏐 子元瓘 元瓘子佐 佐弟俶

第六十八卷

閩世家第八

王審知

子延翰

延翰子鏐

鏐子昶

延翰弟延義

第六十九卷

南平世家第九

高季興

子從誨

從誨子保融

保融弟保勗

第七十卷

東漢世家第十

劉曼

子承鈞

承鈞養子繼恩

繼恩母弟繼元

第七十一卷

十國世家年譜第十一

附錄

第七十二卷

四夷附錄第一

第七十三卷

四夷附錄第二

第七十四卷

四夷附錄第三

徐無黨曰凡諸國名號梁本紀自封梁王以後始稱梁唐本紀自封晉王以後始稱晉自建國號唐以後始稱唐各從其實也白傳而下於未封王建國之前或稱梁稱晉稱唐者史官從後而追書也唐嘗稱晉而石敬瑭又稱晉李昇又稱唐劉龔已稱漢而劉曼又稱漢王建已稱蜀而孟知祥又稱蜀石晉自爲一代不待別而可知唐漢蜀則加東南前後以別其世家梁初嘗封沛東平南唐初嘗稱齊三號當時已不顯著故皆畧而不道五代亂世名號交雜而不常史家撰述隨事爲文要於理通事見而已覽者得以詳焉

五代史目錄終

五代史第一

魏川生鳳蘭
氏雷應爾甫

梁本紀第一

無黨曰本紀因舊以為名本原其所始起而紀次其事與時也即位以前其事詳原本其所自來故曲而備之見其起之有漸有暴也即位以後其事畧居尊任重所責者大故所書者簡惟簡乃可立汰

徐無黨注

太祖神武元聖孝皇帝姓朱氏宋州碭山午溝里人也其父誠以

五經教授鄉里生三子曰全昱存溫變諱某書名義在欄上注中誠卒三子貧不能

為生與其母傭食蕭縣人劉崇家全昱無他材能然為人頗長者

存溫勇有力而溫尤兇悍唐僖宗乾符四年黃巢起曹濮存溫亡

入賊中巢攻嶺南存戰死巢陷京師以溫為東南面行營先鋒使

攻陷同州以為同州防禦使是時天子在蜀諸鎮會兵討賊諸鎮記當時語

也唐謂節度使所治軍州為溫數為河中王重榮所敗屢請益兵於巢巢中

為巢故有赴鎮移鎮之語尉孟楷抑而不通溫客謝瞳說溫曰黃家起於草莽幸唐衰亂直

唐僖宗乾符四年

反古用 義

投其隙而取之爾非有功德興王之業也此豈足與共成事哉今天子在蜀諸鎮之兵日集以謀興復是唐德未厭於人也且將軍力戰于外而庸人制之於內此章邯所以背秦而歸楚也溫以為然乃殺其監軍嚴實自歸於河中因王重榮以降都統王鐸承制拜溫左金吾衛大將軍河中行營招討副使天子賜溫名全忠中和三年三月拜全忠汴州刺史宣武軍節度使四月諸鎮兵破巢復京師巢走藍田七月丁卯全忠歸于宣武是歲黃巢出藍田關陷蔡州節度使秦宗權叛附于巢遂圍陳州徐州時溥凡稱某州某人者皆其節度使為東南面行營兵馬都統會東諸鎮兵以救陳陳州刺史趙犇亦乞兵于全忠溥雖為都統而不親兵四年全忠乃自將救犇率諸鎮兵擊敗巢將黃鄴尚讓等犇以全忠為德始附屬焉是時河東李克用下兵太行渡河出洛陽與東兵會擊巢巢已敗去全忠及

克用追敗之于郟城巢走中牟又敗之于王滿巢走封丘又大敗之巢挺身東走至泰山狼虎谷為時溥追兵所殺九月天子以全忠為檢校司徒同中書門下平章事封沛郡侯光啓二年三月進爵王義成軍亂逐其節度使安師儒推牙將張驍為留後師儒來奔殺之遣朱珍李唐賓陷滑州以胡真為留後十二月封吳興郡王自黃巢死秦宗權稱帝陷陝洛懷孟唐許汝鄭州遣其將秦賢盧瑋張旺攻汴賢軍板橋旺軍北郊瑋軍萬勝環汴為三十六柵王顧兵少不敢出始而稱名既而稱帝漸也爵至王而後稱著其過者乃遣朱珍募兵於東方而求救於兗鄆三年春珍得兵萬人馬數百匹以歸乃擊賢板橋拔其四柵又擊瑋萬勝瑋敗投水死宗權聞瑋等敗乃自將精兵數千柵北郊五月兗州朱瑾鄆州朱宣來赴援流俗本宣從王者非王置酒軍中中席王陽起如廁以輕兵出北門襲旺而樂聲不輟旺不意兵之至

也兗鄆之兵又從而合擊遂大敗之斬首二萬餘級宗權與晁夜走過鄭屠其城而去宗權至蔡復遣張晁攻汴王聞晁復來登封禪寺後岡望晁兵過遣朱珍躡之戒曰晁見吾兵必止望其止當速返毋與之鬪也已而晁見珍在後果止珍卽馳還王令珍引兵蔽大林而自率精騎出其東伏大冢間在晁止而食食畢拔旗幟馳擊珍珍兵小却王引伏兵橫出斷晁軍爲三而擊之晁大敗脫身走宗權怒斬晁而河陽陝洛之兵爲宗權守者聞蔡精兵皆已殲於汴因各潰去故諸葛爽將李罕之取河陽張全義取洛陽以來附十月天子使來賜王紀功碑朱宣朱瑾兵助汴已破宗權東歸王移檄兗鄆誣其誘汴亡卒以東乃發兵攻之取其曹州濮州遂遣朱珍攻鄆州大敗而還十二月天子使來賜王鐵券及德政碑淮南節度使高駢死楊行密入揚州王以王兼淮南節度使王

文德元年

唐僖宗崩

乃表行密爲副使以行軍司馬李璠爲留後璠之揚州行密不納文德元年正月王如淮南至宋州而還是時秦宗權陷襄州以趙德諲爲節度使德諲叛于宗權以來附天子因以王爲蔡州四面行營都統以德諲爲副三月庚子僖宗崩天雄軍亂囚其節度使樂彥貞其子相州刺史從訓攻魏來乞兵遣朱珍助從訓攻魏而魏軍殺彥貞從訓戰死魏人立羅弘信珍乃還張全義取河陽逐李罕之罕之奔于河東李克用遣兵圍河陽全義來求救遣丁會牛存節救之擊敗河東兵于沈河五月行營討蔡州圍之百餘日不克是時時溥已爲東南面都統又以王統行營而溥猶柵都統王乃上書論溥討蔡無功而不落都統且欲激怒溥以起兵端初高駢死淮南亂楚州刺史劉瓚來奔納之及王兵攻蔡不克還欲攻徐乃遣朱珍將兵數千以東聲言送瓚還楚州溥怒論已又聞

龍紀元年

珍以兵來果出兵拒之珍戰于吳康大敗之取其豐蕭二縣遂攻宿州下之珍屯蕭縣別遣龐師古攻徐州龍紀元年正月師古敗溥于呂梁淮西牙將申叢執秦宗權折其足將檻送京師別將郭璠殺叢篡宗權以來獻王遣行軍司馬李璠獻俘于京師表郭璠淮西留後三月天子封王為東平王七月朱珍殺李唐賓王如蕭縣執珍殺之遂攻徐州冬大雨水不能屯軍而旋初秦宗權遣其弟宗衡掠地淮南是歲宗衡為其將孫儒所殺儒攻楊行密于揚州淮南大亂行密走宣州儒入揚州大順元年春遣龐師古攻孫儒于淮南大敗而還四月宿州將張筠以宿州復歸于時溥王自將攻之不克初黃巢敗走李克用追之至于宛胸不及而旋過汴駐軍于北郊王邀克用置酒上源驛夜以兵攻之克用踰城而免訟其事于京師天子知曲在汴而和解之至是張濬私與汴交王

大順元年

二年

厚之以賂濬為汴請伐河東唐諸大臣皆以為不可興師濬挾汴力請益堅天子不得已而許之五月以濬為太原四面行營都統王為東南面招討使然王不親兵以兵三千屬濬而已濬屯于陰地河東叛將馮霸殺潞州守將李克恭來降遣葛從周入潞州李克用遣康君立攻之從周走河陽九月王如河陽十月天子以王兼宣義軍節度使遂如滑州假道于魏以攻河東且責其軍須亦所以怒魏為兵端也魏人果以謂非兵所當出而辭以糧乏皆不許於是攻魏十一月張濬之師大敗于陰地二年正月王及魏人戰于內黃大敗之屠故元城羅弘信來送款十月克宿州十一月曹州將郭紹賓殺其刺史郭饒來降十二月丁會敗朱瑾于金鄉景福元年二月攻鄆州前軍朱友裕敗于斗門王軍後至又敗而還冬友裕取濮州遂攻徐州二年四月龐師古克徐州殺時溥王

景福元年

二年

乾寧元年

二年

三年

四年

光化元年

如徐州以師古為留後遂攻兗鄆乾寧元年二月王及朱宣戰于
 漁山大敗之二年八月又敗宣于梁山十一月又敗之于鉅野兗
 鄆求救于河東李克用發兵救之假道于魏既而魏人擊之克用
 怒大舉攻魏羅弘信來求救遣葛從周救魏是歲李克用封晉王
 三年五月戰于洹水擒克用子落落送于魏殺之七月鳳翔李茂
 貞犯京師天子出居于華州王請以兵赴難天子優詔止之又請
 遷都洛陽不許四年正月麗師古克鄆州王如鄆州以朱友裕為
 留後遂攻兗州朱瑾奔于淮南以葛從周為兗州留後九月攻淮
 南麗師古出清口葛從周出安豐王軍屯于宿州楊行密遣瑾先
 擊清口師古敗死從周亟返兵至于泝河瑾又敗之王懼馳歸光
 化元年三月天子以王兼天平軍節度使四月遣葛從周攻晉之
 山東取邢洛磁三州襄州趙匡凝自其父德諱時來附匡凝又與

楊行密李克用通而其事泄七月遣氏叔琮康懷英攻匡凝取其

泌隨鄧三州

唐三異校定曰三異案唐書地理志唐州天祐三年朱全忠徙治泌陽表更
 乞泌州則是天祐二年唐州舊名猶在至三年始更為泌光化之初未常有
 為泌則誤也匡凝請和乃止十二月李罕之以潞州來降二年幽州

劉仁恭攻魏羅紹威來求救王救魏敗仁恭于內黃四月遣氏叔

琮攻晉太原不克七月李克用取澤潞十一月保義軍亂殺其節

度使王珙推其牙將李璠為留後其將朱簡殺璠來降以簡為保

義軍節度使三年四月遣葛從周攻劉仁恭之滄州取其德州及

仁恭戰于老鵝堤大敗之八月晉取洛州王如洛州復取之是時

鎮定皆附于晉遂攻鎮州破臨城王鎔來送款進攻定州王郜奔

于晉其將王處直以定州降唐宦者劉季述作亂天子幽于東宮

天復元年正月護駕都頭孫德昭誅季述天子復立封王為梁王

遣張存敬攻王珂于河中出舍山下晉絳二州王珂求救于晉晉

天復元年

二年

三年

不能救乃來降三月大舉攻晉氏叔琮出太行取澤路葛從周張存敬侯言張歸厚及鎮定之兵皆會于太原圍之不克遇雨而還五月天子以王兼河中尹護國軍節度使六月晉取慈隰自劉季述等已誅宰相崔胤外與梁交欲假梁兵盡誅宦者而鳳翔李茂貞邠寧王行瑜等皆遣子弟以精兵宿衛天子宦者韓全誨等亦因恃以爲助天子與胤計事宦者屬耳頗聞之乃選美女內之宮中陰令伺察其實久之果得胤奏謀所以誅宦者之說全誨等大懼日夜相與涕泣思圖胤以求全胤知謀泄事急卽矯爲制召梁兵入誅宦者十月王以宣武宣義天平護國兵七萬至于河中取同州遂攻華州韓建出降全誨等聞梁王兵且至卽以岐邠宿衛兵劫天子奔于鳳翔王乃上書言胤所以召之之意天子怒罷胤相責授工部尚書詔梁兵還鎮王引兵去攻邠州屯于三原邠州

節度使楊崇本以邠寧慶衍四州降崔胤奔于華州二年春上退軍于河中晉攻晉絳遣朱友寧擊敗晉軍于蒲縣取汾慈隰遂圍太原不克而還汾慈隰復入于晉四月友寧引兵西至興平及李茂貞戰于武功大敗之王兵犯鳳翔茂貞數出戰輒敗遂圍之十一月鄜坊李周彝以兵救鳳翔王遣孔勅襲鄜州虜周彝之族徙于河中周彝乃降是時岐兵屢敗而圍久城中食盡自天子至後宮皆凍餒三年正月茂貞殺韓全誨等二十人囊其首示梁軍約出天子以爲解甲天子出幸梁軍遣使者馳召崔胤胤託疾不至王使人戲胤曰吾未識天子懼其非是子來爲我辨之天子還至興平胤率百官奉迎王自爲天子執轡且泣且行行十餘里止之見者咸以爲忠己巳天子至自鳳翔素服哭于太廟而後入殺宦者七百餘人二月甲戌天子賜王回天再造竭忠守正功臣以輝

天祐元年

王祚為諸道兵馬元帥王為副元帥王乃留子友倫為護駕指揮
曾三異校定曰三異案家人傳友倫乃王兄存之子其後中書上議亦皆謂之皇姪以為天子衛引兵東歸天子餞于延喜樓賜楊柳枝五曲初梁兵已西青州王師範遣其將劉鄩襲據梁兗州王已還梁四月如邾州遣朱友寧攻青州師範敗之于石樓友寧死九月楊師厚敗青人于臨朐取其棗州師範以青州降而鄩亦降友倫擊鞠墮馬死王怒以崔胤殺之遣朱友謙殺胤于京師曾三異校定曰三異案家人傳友倫非友謙其與友倫擊鞠者皆殺之自天子奔華州王請遷都洛陽雖不許而王命河南張全義修洛陽宮以待天祐元年正月王如河中遣牙將寇彥卿如京師請遷都洛陽并徙長安居人以東天子行至陝州王朝于行在先如東都是時六軍諸衛兵已散亡其從以東者小黃門數十人打毬供奉內園小兒等二百餘人行至穀水王教醫官許昭遠告其謀亂悉殺而代之然

魏昭宗

二年 漢昭宗

上字恂于之誤

後以聞由是天子左右皆梁人矣四月甲辰天子至自西都是時晉王李克用岐王李茂貞楚王趙匡凝蜀王建吳王楊行密曾三異校定曰二異案克用本紀及茂貞傳建行密世家皆書其在唐所投獨匡凝不書其在唐此乃闕文聞梁遷天子洛陽皆欲舉兵討梁王大懼六月楊崇本復附于岐王乃以兵如河中聲言攻崇本遣朱友恭氏叔琮蔣玄暉等行弑昭宗崩十月王朝于京師殺朱友恭氏叔琮十一月攻淮南取其光州攻壽州不克而旋二年二月遣蔣玄暉殺王德裕等九王于九曲池六月殺司空裴贄等百餘人七月天子復使來賜王迎鑾紀功碑王欲代唐使人諭諸鎮襄州趙匡凝以為不可遣楊師厚攻之取其唐鄧復郢隨均房七州王如襄州軍于漢北九月師厚破襄州匡凝奔于淮南師厚取荆南荆南留後趙匡一無明奔于蜀遂出光州以攻壽州不克天子卜祀天子南郊王怒以為蔣玄暉等欲祈天以延唐天子懼改卜郊

三年 唐高宗

十一月辛巳天子封王為魏王相國總百揆以宣武宣義天平護國天雄武順祐國河陽義武昭義武寧保義忠義武昭武定泰寧平盧匡國鎮國荆南忠武二十一軍為魏國備九錫王怒不受十二月天子以王為天下兵馬元帥王益怒遣人告樞密使蔣玄暉與何太后私通殺玄暉而焚之遂弑太后于積善宮又殺宰相柳燦太常卿張延範車裂以徇天子下詔以太后故停郊三年春魏州羅紹威謀殺其牙軍來假兵以虞變王為發兵北攻劉仁恭之滄州兵過魏而紹威已殺牙軍其兵之在外者果皆叛據貝衛瀋博州王以兵悉殺之遂攻滄州軍于長蘆劉仁恭求救于晉晉人取潞州王乃旋軍

五代史第一終

西川忠鳳
氏肅嗣備

五代史第二

西川忠鳳
氏肅嗣備

梁本紀第二

凡五年 梁末
凡四年 梁末
即唐昭宣帝年也
太祖即位

開平元年春正月壬寅天子使御史大夫薛貽矩來勞軍宰相張文蔚率百官來勸進夏四月壬戌更名晁甲子皇帝即位自即位以後大事則書變

古則書非常則書意有所示則書後有所因則書非此五者則否 戊辰大赦赦文皆曰大赦天下此書大見其志之 改元國

號梁封唐主為濟陰王謂天子為唐主錄其本語如此 升汴州為開封府建為東都以

唐東都為西都廢京兆府為雍州州縣廢置見職方考惟京都則書之 賜東都醮一日契丹

阿保機使袍笏梅老來夷狄來不言朝不責其禮不言貢不責其物故書曰來五代亂世著其變來以見夷狄之來不來不因治亂而亂世變來不足

也貴 五月丁丑朔以唐相張文蔚楊涉為門下侍郎御史大夫薛貽矩

為中書侍郎同中書門下平章事戊寅渤海契丹遣使者來夷狄若臣姓名

官爵或書或否不必備或因其舊史之詳畧但書其來以示意爾 乙酉封兄全昱為廣王子友文博王友文非子而書子語在家

傳友珪郢王友璋福王友貞均王友徽建王姪友諒衡王友能惠王

友誨邵王甲午改樞密院為崇政院太府卿敬翔為使是月潞州

行營都指揮使李思安及晉人戰敗績我敗曰敗績後敗曰敗之文理宜然已見行營故戰不言地六月

甲寅平盧軍節度使韓建守司徒同中書門下平章事秋七月已

亥追尊祖考為皇帝妣為皇后皇高祖黜謚曰宣元廟號肅祖祖

妣范氏謚曰宣僖曾祖茂林謚曰光獻廟號敬祖祖妣楊氏謚曰

光孝祖信謚曰昭武廟號憲祖祖妣劉氏謚曰昭懿考誠謚曰文

穆廟號烈祖妣王氏謚曰文惠八月丁卯同州好畤蟲生隰州黃

河清於此書見不為瑞也九月括馬冬十月己未講武于繁臺十一月壬寅赦亡

命背軍髡黥刑徒於好殺之世小赦必書見其亦有愛人之意也

二年春正月丁酉渤海遣使者來已亥十郊於西都弒濟陰王弒臣

大惡也書濟陰王從二月辛未契丹阿保機遣使者來三月壬申朔如西

都辛巳至也如往而未至之辭書如則在道有事可以書丙子如懷州五代亂世兵無虛日不可悉書故用兵無勝敗攻城無得失皆不書其命大將與天子有所知

自著大事爾此如懷澤者以兵方政潞州也丁丑如澤州戊寅封鴻臚卿李崧介國公為二王

後梁嘗更戊曰武而舊史悉復為戊壬午匡國軍節度使劉知俊為潞州行營招討使癸

巳十郊張文蔚薨夏四月癸卯楊涉罷吏部侍郎于兢為中書侍

郎翰林學士承旨禮部侍郎張策為刑部侍郎同中書門下平章

事壬子至澤州五月巳丑潞州行營都虞侯康懷英及晉人戰于

夾城敗績築城圍潞戰于城中故書地戊戌立唐三廟契丹遣使者來六月壬寅忠

武軍節度使劉知俊為西路行營招討使以伐岐用兵之名有四兩相攻曰攻以大如小曰伐有

罪曰討天子自征曰征隨事為文不得不異非有褒貶也巳酉殺金吾衛上將軍王師範滅其族當殺曰伏誅不當殺者以

兩相殺為文丙辰劉知俊及岐人戰于漠谷敗之秋九月丁丑如陝州以晉

晉絳故也博王友文留守東都冬十月丁未至自陝州十一月癸巳張策

罷左僕射楊涉同中書門下平章事十二月巳亥以介國公為三

恪鄰國公萊國公為二王後

三年春正月甲戌如西都復燃燈以祈福

錄其詔意則其失可知 庚寅享于太廟辛卯有事于南郊祀天子南郊書曰有事錄當時語 大赦丙申羣

臣上尊號曰睿文聖武廣孝皇帝二月壬戌講武于西杏園甲子

延州高萬興叛于岐來降唐末之亂強弱相并或去彼來此不可為常 三月辛未

渤海國王大謏遣使者來甲戌如河中以高萬興降劉知俊兵攻鄜延故也 山南東道節

度使楊師厚為潞州四面行營招討使劉知俊取丹州夏四月丙

午知俊克延鄜坊三州易得曰取難得曰克文理宜然 五月己卯至自河中殺佑國軍

節度使王重師六月庚戌劉知俊執佑國軍節度使劉捍叛附于

岐以身歸曰降以地歸曰附亦文理宜然知俊為忠武軍節度使以同州附岐今直書知俊叛而不言地益忠武已見上文 辛亥如陝州以劉知俊叛故也 乙

卯冀王朱友謙為同州東面行營招討使劉知俊奔于岐丹州軍

亂逐其刺史宋知誨秋七月商州軍亂逐其刺史李稠稠奔于岐

乙丑克丹州執其首惡王行思初不知首惡之人故直曰軍亂既克而推得之也丹州無土將姓名行思無官爵又不見伏誅之日

皆舊尹 乙亥至自陝州甲申襄州軍亂殺其留後王班智不足以衛身才不

失之 房州刺史楊虔叛附于蜀八月辛亥降死罪

囚辛酉均州刺史張敬方克房州執楊虔閏月癸酉契丹遣使者

來己卯閱稼于西苑九月壬寅行營招討使左衛上將軍陳暉克

襄州執其首惡李洪命卿討亂舊史失不書至此始見既克而推得其首惡故初亦且書亂軍 丁未保義軍節度使

王檀為潞州東面行營招討使辛亥韓建楊涉罷太常卿趙光逢

為中書侍郎翰林學士承旨工部侍郎杜曉為戶部侍郎同中書

門下平章事辛酉李洪楊虔伏誅冬十一月甲午日南至告謝予

南郊南至不必書因其以至日告謝而書告謝未用辛酉故書之不曰有事于南郊亦從其本語蓋比南郊禮 己酉搜訪賢良鎮國軍

節度使康懷英伐岐十二月懷英克寧慶衍三州及劉知俊戰于

升平敗績

四年春正月壬辰朔始用樂自唐末之亂禮樂至此始用樂故書 丁未講武于榆林二月

予當作于

已丑閱稼于穀水秋八月丙寅如陝州以岐人晉人河南尹張宗奭留

守西都辛未護國軍節度使楊師厚為西路行營招討使以伐岐

九月已丑至自陝州辛亥搜訪賢良冬十一月已丑寧國軍節度

使王景仁為北面行營招討使以伐趙趙王王鎔北平王王處直

叛附于晉晉人救趙十二月癸酉頒律令格式

乾化元年春正月丁亥王景仁及晉人戰于栢鄉敗績與寅赦流

罪以下因求危言正諫癸巳天雄軍節度使楊師厚為北面行營

招討使夏四月壬申契丹阿保機遣使者來五月甲申朔大赦改

元癸巳幸張宗奭第秋八月戊辰閱稼于榆林渤海遣使者來戊

寅大閱于興安鞠場九月辛巳朔御文明殿入閣御殿而云入閣錄其本

丙子大閱于魏東郊十一月高萬興取鹽州壬辰至自魏州乙未

回鶻吐蕃遣使者來

二年春二月丁巳光祿卿盧毗使于蜀甲子如魏州亦以晉人及鎮張

宗奭留守西都次白馬殺左散騎常侍孫騫右諫議大夫張衍兵

部郎中張儵戊寅如貝州三月丙戌屠棗彊書屠者其丁未復如魏州

夏四月已巳至自魏州下書如西都則戊寅如西都五月丁亥德音降死

罪已下囚德音赦之小者從罷役徒禁屠及捕生渤海遣使者來是月薛

貽矩薨六月疾革郢王友珪反叛者背此而附彼猶臣於人也反自下謀上惡逆

得而日反非一朝一夕不之大者也曰月之書不書雖無義例而事亦有不戊寅皇帝崩年六十一不書崩處以異於得其終者乾化二年十一月

嗚呼天下之惡梁久矣自後唐以來皆以為偽也至于論次五代

獨不為梁而議者或譏予大失春秋之旨以謂梁負大惡當加誅

絕而反進之是獎篡也非春秋之志也予應之曰是春秋之志爾

魯桓公弑隱公而自立者宣公弑子赤而自立者鄭厲公逐世子

在位六年
為子孫所弑

忽而自立者衛公孫剽逐其君而自立者聖人於春秋皆不絕其為君此子所以不偽梁者用春秋之法也然則春秋亦獎篡乎曰惟不絕四者之為君於此見春秋之意也聖人之於春秋用意深故能勸戒切為言信然後善惡明夫欲著其罪於後世在乎不沒其實其實嘗為君矣書其為君其實篡也書其篡各傳其實而使後世信之則四君之罪不可得而掩爾使為君者不得掩其惡然後人知惡名不可逃則為惡者庶乎其息矣是謂用意深而勸戒切為言信而善惡明也桀紂不待貶其王而萬世所共惡者也春秋於大惡之君不誅絕之者不害其褒善貶惡之旨也惟不沒其實以著其罪而信乎後世與其為君而不得掩其惡以息人之為惡能知春秋之此意然後知予不偽梁之旨也

五代史第二終

魏川屯鳳蘭
氏蘭南甫

五代史第三

魏川屯鳳蘭
氏蘭南甫

梁本紀第三

末帝太祖第三子友貞也末非謚號從其本語為人美容貌沈厚寡言雅好儒

乾化年

翠 郭委理覽

士太祖即位封均王為左天興軍使東京馬步軍都指揮使乾化二年六月太祖遇弒友珪自立殺博王友文以弒帝之罪歸之以王為東京留守開封尹敬翔為中書侍郎同中書門下平章事戶部尚書李振為崇政院使明年友珪改元曰鳳曆二月駙馬都尉趙巖至東都王私與之謀遣馬慎交之魏州見楊師厚計事師厚遣小校王舜賢至洛陽告左龍虎統軍袁象先使討賊是時懷州龍驤屯兵叛方捕索之王乃偽為友珪詔書發左右龍驤在東都者皆還洛陽因激怒之曰天子以懷州屯兵叛追汝等欲盡坑之諸將皆泣莫知所為王曰先皇帝經營王業三十餘年今日尚為

凡十一年
未帝即位
乾化三年

凡三年

友珪所殺汝等安所逃死乎因出太祖画像示諸將而泣曰汝能趨洛陽擒逆賊則轉禍為福矣軍士皆呼萬歲請王為主王乃遣人趣象先等庚寅象先等以禁兵討賊友珪死杜曉見殺象先遣趙巖持傳國寶至東都請王入洛陽王報曰夷門太祖所以興王業也北拒并汾東至淮海國家藩鎮多在東方命將出師利于便近是月皇帝即位於東都即位大事失其日而書是月見亂之甚於東都終上文也復禰乾化三年復博王友文官爵三月丁未更名鐸夏五月楊師厚取滄州秋九月甲辰御史大夫姚洎為中書侍郎同中書門下平章事冬十二月晉人取幽州

四年夏四月丁丑貶于兢為萊州司馬武寧軍節度使蔣殷反天平軍節度使牛存節討之

貞明元年春正月存節克徐州時蔣殷自燔死故不書伏誅二月丁卯趙光逢罷平

盧軍節度使賀德倫為天雄軍節度使命官不書非常而有故則分其相瀆書此書為天雄軍亂張本

衛州為昭德軍宣徽使張筠為節度使己丑天雄軍亂賀德倫叛

附于晉軍亂有首惡不書而書德倫叛責貴者深也德倫不可加以首惡而可責其不死以叛張彥寔首惡而畧不書彥微者德倫可誅而不誅故以德倫獨任其責邠州

李保衡叛于岐來附夏六月庚寅朔晉王李存勗入于魏州遂取

德州冬十月辛亥康王友孜反伏誅反者不日誅反者有日故書十一月乙丑改元耀

州溫昭圖叛于岐來附是歲更名瑱舊史失其日月

二年春二月丙申楊涉罷三月鎮南軍節度使劉鄩及晉人戰于

故元城敗績奔于滑州晉人取衛州惠州捉生都將李霸反伏誅

夏六月捉生都將張溫叛降于晉秋七月晉人取相州張筠奔于

京師安國軍節度使閻寶叛附于晉八月丁酉太子太保致仕趙

光逢為司空兼門下侍郎同中書門下平章事九月晉人取滄州

橫海軍節度使戴思遠奔于京師晉人克貝州守將張源德死之

書死得其死也

冬十月丁酉中書侍郎鄭珏同中書門下平章事

三年夏四月辛卯右千牛衛大將軍劉瓌使于契丹冬十二月宣義軍節度使賀瓌為北面行營招討使已巳如西都卜郊晉人取楊劉

四年正月不克郊已卯至自西都夏四月巳酉尚書吏部侍郎蕭頃為中書侍郎同中書門下平章事巳巳趙光逢罷冬十二月庚子朔賀瓌殺其將謝彥章孟審澄侯溫裕癸亥瓌及晉人戰于胡柳敗績是歲秦寧軍節度使張守進叛附于晉亳州團練使劉鄩為兗州安撫制置以討之舊史不書亡其月日故書于歲末為明年兗州張本五年春正月晉軍于德勝用兵無勝敗不書此梁晉得失所繫故書也秋八月乙未朔開封尹王瓚為北面行營招討使冬十月劉鄩克兗州張守進伏誅十二月晉人取濮陽天平軍節度使霍彥威為北面行營招討使

凡三年

六年夏四月巳亥降死罪以下囚乙巳尚書左丞李琪為中書侍郎同中書門下平章事河中節度使朱友謙襲同州殺其節度使程全暉叛附于晉秦寧軍節度使劉鄩討之秋七月陳州妖賊母乙自稱天子九月庚寅供奉官郎公遠為契丹歡好使冬十月母乙伏誅

龍德元年春趙將張文禮殺其君鎔來乞師不許文禮初為鎔養子號王德明此書張文禮者從

舊史也三月丁亥朔禁私度僧尼陳州刺史惠王能反夏五月丙戌朔

德音改元降流罪已下囚秋赦友能降封房陵侯天平軍節度使戴思遠為北面行營招討使冬十月思遠及晉人戰于戚城敗績二年春正月思遠襲魏州取成安秋八月滑州兵馬留後段凝攻衛州執其刺史李存儒戴思遠克淇門共城新鄉

三年春三月潞州李繼韜叛于晉來附夏閏四月唐人取鄆州晉未即位

在十年

已自與梁為敵國至其建號於梁無所利害
故不書唐建號而書唐人者因事而見爾
五月庚申宣義軍節度使王彥章為
北面行營招討使先鋒將康延孝叛降于唐冬十月甲戌宣義軍
節度使王彥章及唐人戰于中都敗績死之
凡官皆不重書此書者嫌彥章已罷招討使而與唐戰蓋罷使而別將兵以戰也
唐人取曹州盜竊傳國寶奔于唐戊寅皇帝崩年三十六梁
亡
書曰梁亡見唐莊宗之立速也四月莊宗立稱唐十月梁始亡見唐不待滅梁而立

五代史第三終

燕川屯鳳臺
氏周回南由

五代史第四

燕川屯鳳臺
氏周回南由

唐本紀第四

唐德宗時

貞元中

李國昌

懿宗咸通十年

莊宗光聖神閔孝皇帝其先本號朱邪蓋出於西突厥至其後世
別自號曰沙陀而以朱邪為姓唐德宗時有朱邪盡忠者居於北
庭之金滿州貞元中吐蕃贊普攻陷北庭徙盡忠於甘州而役屬
之其後贊普為回鶻所敗盡忠與其子執宜東走贊普怒追之及
于石門關盡忠戰死執宜獨走歸唐居之鹽州以隸河西節度使
范希朝希朝徙鎮太原執宜從之居之定襄神武川之新城其部
落萬騎皆驍勇善騎射號沙陀軍執宜死其子曰赤心懿宗咸通
十年神策大將軍康承訓統十八將討龐勛於徐州以朱邪赤心
為太原行營招討沙陀三部落軍使以從破勛功拜單于大都護
鎮武軍節度使賜姓名李國昌以之屬籍沙陀素強而國昌恃功

及古胡

三年
克用

明年僖宗即位

益橫恣懿宗患之十三年徙國昌雲州刺史大同軍防禦使國昌
稱疾拒命國昌子克用尤善騎射能仰中雙鳧為雲州守捉使國
昌已拒命克用乃殺大同軍防禦使段文楚據雲州自稱留後唐
以太僕卿盧簡方為振武節度使會幽并兵討之簡方行至鳳州
軍潰由是沙陀侵掠代北為邊患矣明年僖宗即位以謂前太原
節度使李業遇沙陀有恩而業已死乃以其子鈞為靈武節度使
宣慰沙陀六州三部落使六州三部落皆不見其名處據唐書除使有此語以招輯之拜克用大
同軍防禦使居久之國昌出擊党項吐渾赫連鐸襲破振武克用
聞之自雲州往迎國昌而雲州人亦閉關拒之國昌父子無所歸
因掠蔚朔間得兵三千國昌入保蔚州克用還據新城僖宗乃拜
鐸大同軍使以李鈞為代北招討使以討沙陀乾符五年沙陀破
遮虜軍又破岢嵐軍而唐兵數敗沙陀出此益熾北據蔚朔南侵

乾符五年

廣明元年

二年

中和元年

忻代嵐石至于太谷焉廣明元年招討使李琢會幽州李可舉雲
州赫連鐸擊沙陀克用與可舉相拒雄武軍其叔父友金以蔚朔
州降于琢克用聞之遽還可舉追至藥兒嶺大敗之琢軍夾擊又
敗之于蔚州沙陀大潰克用父子亡入達靼克用少驍勇軍中號
曰李鷄兒其一目眇及其貴也又號獨眼龍其威名益於代北其
在達靼久之鬱鬱不得志又常懼其圖已因時時從其羣豪射獵
或掛針於木或立馬鞭百步射之輒中羣豪皆服以為神黃巢已
陷京師中和元年代北起軍使陳景思發沙陀先所降者與吐渾
安慶等萬人赴京師行至絳州沙陀軍亂大掠而還景思念沙陀
非克用不可將乃以詔書召克用於達靼承制以為代州刺史鴈
門以北行營節度使率蕃漢萬人出石嶺關過太原求發軍錢節
度使鄭從讜與之錢千緡米千石克用怒縱兵大掠而還二年十

一月景思克用復以步騎萬七千赴京師三年正月至于河中進屯乾阮巢黨驚曰鴟兒軍至矣二月敗巢將黃鄴於石隄谷三月又敗趙章尚讓於良田坡橫屍三十里是時諸鎮兵皆會長安大戰渭橋賊敗走入城克用乘勝追之自光泰門先入戰望春宮昇陽殿巢敗南走出藍田關京師平克用功第一天子拜克用檢校司空同中書門下平章事河東節度使以國昌為鴈門以北行營節度使十月國昌卒十一月遣其弟克修攻昭義孟方立取其澤潞二州方立走山東以邢洛磁三州自別為昭義軍昭義軍在唐時跨是澤潞入于晉邢洛磁孟氏據之故當時有兩昭義黃巢南走至蔡州降秦宗權遂攻陳州四年克用以兵五萬救陳州出天井關假道河陽諸葛爽不許乃自河中渡河四月敗尚讓於太康又敗黃鄴於西華巢且走且戰至中牟臨河未渡而克用追及之賊眾驚潰比至封丘又敗之巢脫身走

克用追之一日夜馳二百里至于免胸不及而還過汴州休軍封禪寺朱全忠饗克用於上源驛夜河罷克用醉卧伏兵發火起侍者郭景銖滅燭匿克用牀下以水一而告以難會天大雨滅火克用得從者薛鐵山賀回鶻等隨雷光繼尉氏門出還軍中七月至于太原訟其事于京師請加兵于汴遣弟克修將兵萬人屯于河中以待僖宗和解之用破巢功封克用隴西郡王光啓元年河中王重榮與宦者田令孜有隙徙重榮兗州以定州王處存為河中節度使詔克用以兵護處存之克用不辭號故不稱王焉重榮使人給克用曰天子詔重榮俟克用至與處存共之因偽為詔書示克用曰此朱全忠之謀也克用信之八上表請請全忠僖宗不許克用大怒重榮既不肯徙僖宗遣邠州朱玫鳳翔李昌符討之克用反以兵助重榮敗玫于沙苑遂犯京師縱火大掠天子出居于興元克用

明

大順元年

退屯河中朱玫亦反以兵追天子不及得襄王熅迫之欄帝屯于鳳翔僖宗念獨克用可以破攻云不能使也當破黃巢長安時天下兵馬都監楊復恭與克用善遣諫議大夫劉崇望以詔書召克用且道復恭意使進兵討玫克用陽諾而不行明年孟方立死其弟遷立大順元年克用擊孟遷取邢洛懿三州乃遣安金俊攻赫連鐸於雲州幽州李匡威救鐸戰於蔚州金俊大敗於是匡威鐸及朱全忠等皆請因其敗伐之昭宗以克用破黃巢功高不可伐下其事臺省四品官議者多言不可宰相張濬獨以謂沙陀前逼僖宗幸興元罪當誅伐軍容使楊復恭克用所善也亦極諫以為不可昭宗然之詔命全忠等全忠陰賂濬使持其議益堅昭宗不得已以濬為太原四面行營兵馬都統韓建為副使是時潞州將馮霸叛降于梁梁遣葛從周入潞州唐以京兆尹孫

二年

揆為昭義軍節度使克用遣李存孝執揆於長子又遣康君立取潞州十一月濬及克用戰于陰地濬軍三戰三敗濬建逃歸克用兵大掠晉絳至于河中赤地千里克用上表自訴其辭慢侮天子為之引咎優詔答之二年二月退拜克用河東節度使隴西郡王加檢校太師兼中書令四月攻赫連鐸于雲州圍之百餘日鐸走吐渾八月大蒐于太原出晉絳掠懷孟至于邢州遂攻王鎔于鎮州克用柵常山西以十餘騎渡滹沱覘敵遇大雨平地水深數尺鎮人襲之克用匿林中禱其馬曰吾世有太原者馬不嘶馬偶不嘶以免前軍李存孝取臨城進攻元氏李匡威救鎔克用退軍邢州景福元年王鎔攻邢州李存信李嗣勳等敗鎔于堯山二月會王處存攻鎔戰于新市為鎔所敗八月李匡威攻雲州以牽克用之兵克用潛入于雲州返出擊匡威匡威敗走十月李存孝以邢州

景福元年

二年

乾寧元年

餘月例

封克用晉王

三年

四年

光化元年

叛二年存孝求援於王鎔克用出兵井陘擊鎔且以書招鎔而急
 攻其平山鎔懼遂與克用通和獻帛五十萬疋出兵助攻邢州乾
 寧元年三月執存孝殺之冬攻幽州李匡儔棄城走追至景城見
 殺以劉仁恭為留後二年河中王重盈卒其諸子珂珙爭立克用
 請立珂鳳翔李茂貞邠寧王行瑜華州韓建請立珙昭宗初兩難
 之乃以宰相崔胤為河中節度使既而許克用立珂茂貞等怒三
 鎮兵犯京師聞克用亦起兵乃皆罷去六月克用攻絳州斬刺史
 王瑤瑤珙弟助珙以爭者七月至平河中同州王行約奔于京師
 陽言曰沙陀十萬至矣謀奉天子去邠州茂貞假子闞圭亦謀劫
 幸鳳翔京師大亂昭宗出居于石門克用軍留餘月不進昭宗遣
 延王戒丕丹王允兒事克用且告急八月克用進軍渭橋以為邠
 寧四面行營都統昭宗還京師十一月克用擊破邠州王行瑜走

至慶州見殺克用還軍雲陽請擊茂貞昭宗慰勞克用使與茂貞
 解仇以紓難拜克用忠正平難功臣封晉王是時晉軍渭北遇雨
 六十日或勸克用入朝克用未決都押衙蓋寓曰天子還自石門
 寢未安席若晉兵渡渭人情豈復能安勤王而已何必朝哉克用
 笑曰蓋寓猶不信我况天下乎乃收軍而還三年正月昭宗復以
 張濬為相克用曰此朱全忠之謀也乃上表曰若陛下朝以濬為
 相則臣將暮至闕庭京師大恐濬命遽止朱全忠之攻兗鄆也克
 用遣李存信假道魏州以救朱宣等存信屯于莘縣軍士侵掠魏
 境羅弘信伏兵攻之存信敗走洛州克用自將擊魏戰于洹水亡
 其子落落六月破魏成安洹水臨漳等十餘邑十月又敗魏人于
 白龍潭進攻觀音門全忠救至乃解四年劉仁恭叛晉克用以兵
 五萬擊仁恭戰于安塞克用大敗光化元年朱全忠遣葛從周攻

三年

三年

天復元年

下邢洛礮三州克用遣周德威出青山口遇從周于張公橋德威
 大敗冬潞州守將薛志勤卒李罕之據潞州叛附于朱全忠二年
 全忠遣氏叔琮攻破承天軍又破遼州至于榆次周德威敗之于
 洞渦秋李嗣昭復取澤潞三年嗣昭敗汴軍于汴河復取洛州朱
 全忠自將圍之嗣昭走至青山口遇汴伏兵嗣昭大敗秋嗣昭取
 懷州是歲汴人攻鎮定鎮定皆絕晉以附于朱全忠天復元年全
 忠封梁王梁攻下晉絳河中執王珂以歸晉失三與國乃下意為
 書幣聘梁以求和梁王以為晉弱可取乃曰晉雖請盟而書辭慢
 因大舉擊晉四月氏叔琮入天井張文敬入新口葛從周入上門
 王處直入飛狐侯言入陰地叔琮取澤潞其別將白奉國破承天
 軍遼州守將張鄂汾州守將李瑋皆迎梁軍降晉人大懼會天大
 雨霖梁兵多疾皆解去五月晉復取汾州誅李瑋六月周德威李嗣

二年

二年

六年

七年

昭取慈隰二年進攻晉絳大敗于蒲縣梁軍乘勝破汾慈隰三州
 遂圍太原克用大懼謀出奔雲州又欲奔匈奴未決梁軍大疫解
 去周德威復取汾慈隰三州四年梁遷唐都於洛陽改元曰天祐
 克用以謂劫天子以遷都者梁也天祐非唐號不可稱乃仍稱天
 復五年會契丹阿保機於雲中約為兄弟六年梁攻燕滄州燕王
 劉仁恭來乞師克用恨仁恭反覆欲不許其子存勗諫曰此吾復
 振之時也今天下之勢歸梁者十七八疆如趙魏中山莫不聽命
 是自河以北無為梁患者其所憚者惟我與仁恭耳若燕晉合勢
 非梁之福也夫為天下者不顧小怨且彼常困我而我急其難可
 因以德而懷之是謂一舉而兩得此不可失之機也克用以為然
 乃為燕出兵攻破潞州梁圍乃解去以李嗣昭為潞州留後後七
 年梁兵十萬攻潞州圍以夾城遣周德威救潞州軍于亂柳冬克

用疾是歲梁滅唐克用復稱天祐四年五月辛卯克用卒年
五十三子存勗立葬克用於鴈門

嗚呼世久而失其傳者多矣豈獨史官之謬哉李氏之先蓋出於
西突厥本號朱邪至其後世別自號曰沙陀而以朱邪爲姓拔野
古爲始祖其自序云沙陀者北庭之磧也當唐太宗時破西突厥
諸部分同羅僕骨之人於此磧置沙陀府而以其始祖拔野古爲
都督其傳子孫數世皆爲沙陀都督故其後世因自號沙陀然予
考于傳記其說皆非也夷狄無姓氏朱邪部族之號耳拔野古與
朱邪同時人非其始祖而唐太宗時未嘗有沙陀府也唐太宗破
西突厥分其諸部置十三州以同羅爲龜林都督府僕骨爲金微
都督府拔野古爲幽陵都督府未嘗有沙陀府也當是時西突厥
有鐵勒延陀阿史那之類爲最大其別部有同羅僕骨拔野古等

以十數蓋其小者也又有處月處密諸部又其小者也朱邪者處
月別部之號耳太宗二十二年已降拔野古其明年阿史那賀魯
叛至高宗永徽二年處月朱邪孤注從賀魯戰于牢山爲契苾何
力所敗遂沒不見後百五十年當憲宗時有朱邪盡忠及子執
宜見於中國而自號沙陀以朱邪爲姓矣蓋沙陀者大磧也在金
莎山之陽蒲類海之東自處月以來居此磧號沙陀突厥而夷狄
無文字傳記朱邪又微不足錄故其後世自失其傳至盡忠孫始
賜姓李氏李氏後大而夷狄之人遂以沙陀爲貴種云

五代史第五

唐本紀第五

藝文志
氏周而南

存勗克用長子也初克用破孟方立于邢州還軍上黨置酒三垂
崗伶人奏百年歌至于衰老之際聲辭甚悲坐上皆悽愴時存勗
在側方五歲克用慨然捋鬚指而笑曰吾行老矣此奇兒也後二
十年其能代我戰于此乎存勗年十一從克用破王行瑜遣獻捷
于京師昭宗異其狀貌賜以鴻鵠卮翡翠盤而撫其背曰兒有奇
表後當富貴無忘予家及長善騎射膽勇過人稍習春秋通大義
尤喜音聲歌舞俳優之戲天祐五年正月即王位于太原叔父克
寧殺都虞侯李存質倖臣史敬鎔告克寧謀叛二月執而戕之且
以先王之喪叔父之難告周德威德威自亂柳還軍太原梁夾城
兵聞晉有大喪德威軍且去因頗懈王謂諸將曰梁人幸我大喪

天祐五年

六年

七年

八年

九年

十年

十一年

十二年

謂我少而新立無能為也宜乘其怠擊之乃出兵趨上黨行至三垂崗歎曰此先王置酒處也會天大霧晝瞑兵行霧中攻其夾城破之梁軍大敗凱旋告廟九月蜀王王建岐王李茂貞及楊崇本攻梁大安晉亦遣周德威攻其晉州敗梁軍于神山六年劉知俊叛梁來乞師王自將至陰地關遣周德威攻晉州敗梁軍于蒙阮七年冬梁遣王景仁攻趙王王鎔來乞師諸將皆疑鎔詐未可出兵王不聽乃救趙八年正月敗梁軍于柏鄉斬首二萬級獲其將校三百人馬二千匹進攻邢州不下留兵圍之去攻魏別遣周德威徇梁夏津高唐攻博州破東武朝城遂擊黎陽臨河淇門掠新鄉共城燕王劉守光聞晉攻梁深入乃大治兵聲言助晉王患之乃旋師七月會趙王王鎔于承天軍劉守光稱帝于燕九年正月遣周德威會鎮定以攻燕守光求救於梁梁軍攻趙屠襄彊李

存審擊走之八月朱友謙以河中叛于梁來降梁遣康懷英討友謙友謙復臣于梁而亦陰附于晉十年十月劉守光請降王如幽州守光背約不降攻破之十一年殺燕王劉守光于太原用其父仁恭于鴈門剖心以祭墓也於是趙王王鎔北平王王處直奉冊推王為尚書令始建行臺七月攻梁邢州戰于張公橋晉軍大敗十二年魏州軍亂賀德倫以魏博二州叛于梁來附王入魏州行至永濟誅其亂首張彥以其兵五百自衛號帳前銀鎗軍六月王兼領魏博節度使取德州七月取澶州劉鄩軍于洹水王率百騎覘其營遇鄩伏兵圍之數重決圍而出亡七八騎八月梁復取澶州晉軍與鄩對壘于莘晉軍數挑戰鄩閉壁不出十三年正月王留李存審于莘聲言西歸鄩聞晉王且去即引兵擊魏攻城東王行至貝州返擊鄩大敗之追至于故元城又敗之鄩走黎陽三月攻梁衛州

五年

降其刺史米昭克磁州殺其刺史靳昭四月克洛州八月圍邢州
降其節度使閻寶梁張筠棄相州戴思遠棄滄州而逃遂取二州
而貝州人殺梁守將張源德以城降契丹寇蔚州執振武節度使
李嗣本十四年契丹寇新州遂寇幽州李嗣源擊走之冬梁謝彥
章軍于楊劉十二月攻楊劉王自負芻以堽壘遂破之十五年正
月梁晉相拒于楊劉彥章決河水以隔晉軍六月渡水擊彥章破
其四寨八月大閱于魏合盧龍橫海昭義安國及鎮定之兵十萬
馬萬匹軍于麻家渡謝彥章軍于行臺十二月進軍臨濮梁軍追
之戰于胡柳晉軍大敗周德威死之梁軍暮休于土山晉軍復擊
大敗之遂軍德勝為夾寨十六年正月王兼領盧龍軍節度使梁
王瓚攻德勝南城不克十月廣德勝北城十二月敗梁軍于河南
十七年朱友謙襲同州梁遣劉鄩擊友謙李存審敗梁軍于同州

六年

七年

八年

存審即寶

十八年正月魏州僧傳真獻唐受命寶一趙將張文禮弑其君鎔
文禮來請命二月以文禮為鎮州兵馬留後三月河中節度使朱
友謙昭義軍節度使李嗣昭橫海軍節度使李存審義武軍節度
使王處直安國軍節度使李嗣源鎮州兵馬留後張文禮領天平
軍節度使閻寶大同軍節度使李存璋振武軍節度使李存進匡
國軍節度使朱令德請王即皇帝位王三辭友謙等三請王曰予
當思之八月遣趙王王鎔故將符習及閻寶史建瑋等攻張文禮
於鎮州建瑋取趙州張文禮卒其子處瑾閉城拒守九月建瑋戰
死十月梁戴思遠攻德勝北城李嗣源敗之于威城王處直叛附
于契丹其子都幽處直以來附十二月契丹寇涿州遂寇定州十
九年正月敗契丹于新城望都追奔至于幽州三月閻寶敗于鎮
州以李嗣昭代之四月嗣昭戰死以李存進代之八月梁取衛州

即梁末帝蕭詧
存勗即帝位
凡四年

九月存進敗鎮人于東垣存進戰死十月李存審克鎮州王兼領成德軍節度使

同光元年春三月李繼韜以潞州叛附于梁夏四月己巳皇帝即位大赦改元國號唐行臺左丞相豆盧革為門下侍郎右丞相盧

程為中書侍郎同中書門下平章事門下使郭崇韜昭義監軍張

居翰為樞密使樞密使唐故以宦者為之其職甚微至此始為用士人而與宰相權任鈞安故與宰相並書以魏州為東京太

原為西京鎮州為北都閏月追尊祖考為皇帝妣為皇后曾祖執

宜祖妣崔氏皆謚曰昭烈廟號懿祖祖國昌祖妣秦氏皆謚曰文

景廟號獻祖考謚曰武廟號太祖立廟于太原自唐高祖太宗懿

宗昭宗為七廟追尊祖考則立廟可知故皆不書廟此書者以立高祖已下四廟故也此大事也舊史失其日壬寅李嗣源取鄆

州後唐太祖置義兒軍如李嗣昭等甚眾初皆賜姓名而不全若子五月辛酉梁人取德

勝南城六月及王彥章戰于新壘敗之是月盧程罷秋八月梁人

克澤州唐末澤潞皆屬晉梁初已得澤州至此又屬晉而梁克之中間不見晉得澤州年月蓋舊史闕不書五代之亂戰爭攻取彼此得失不常多類此也守將裴約

死之九月戊辰李嗣源及王彥章戰于遞坊敗之冬十月壬申如

鄆州以襲梁捨其不備疾馳而入之故甲戌取中都丁丑取曹州己卯滅梁

敬翔自殺翔為梁臣梁所以亡唐翔之謀為多梁之亡也翔雖死之不書死而書自殺死大節也見不輕于人丙戌貶鄭珽為萊州

司戶叅軍蕭瑒登州司戶叅軍殺李振趙巖張漢傑朱瑋滅其族

已丑德音降死罪囚流已下原之十一月乙巳復北都為鎮州太

原為北都丙辰復汴州為宣武軍丁巳尚書左丞趙光胤為中書

侍郎禮部侍郎韋說同中書門下平章事戊午新羅國王金朴英

遣使者來辛酉復永平軍為西都甲子如洛京洛京從當時語十二月庚午

朔至自汴州辛巳李繼韜伏誅繼韜之弟繼達殺其兄繼儔于潞

州繼儔以被殺書非不予其死蓋繼達殺兄自當著其罪爾與書弑其君者同壬辰攻于伊闕

二年春正月河南尹張全義反諸鎮進暖殿物已酉求唐宦者凡書過惡

滅梁

反及誤

辭無識取者直書其實而自見也

庚戌新羅國王金朴英及其泉州節度使王逢規皆遣

使者來乙卯渤海國王大諲譔使大禹謨來庚申如河陽

迎皇太后也太后曹氏莊

宗母也莊宗即位遣盧程奉冊為皇太后舊史實錄皆無奉冊月日故不書

辛酉至自河陽丁卯七廟神主至自太

原祔于太廟朝獻于太微宮戊辰享于太廟二月己巳朔有事于

南郊大赦癸酉羣臣上尊號曰昭文睿武光孝皇帝戊寅幸李嗣

源第癸未立劉氏為皇后

五代十二君立后者七辭有不同立得其正者曰以其妃某夫人某氏為皇后其不正者直曰立某氏為皇后嫌與

得正同爾無褒貶也

三月己酉党項來庚戌賜從平汴州及入洛南郊立仗軍士

等功臣庚申工部郎中李塗為檢視諸陵使

唐諸帝陵也

潞州將楊立反

夏五月壬寅教坊使陳俊為景州刺史內園栽接使儲德源為憲

州刺史

命官不書此書其甚也

丙辰渤海國王大諲譔遣使者來丙寅李嗣源克

潞州

不書命將舊史闕

六月丙子楊立伏誅己丑封回紇王仁美為英義可汗

秋七月己酉如雷山賽天神

夷狄之事也

八月大雨霖河溢九月壬子置水

于城門以禳災惑

本紀書災不書異災惑為置水非禮書爾見其有悞禱之意而不知其

者異也以其不可知故不書爾

甲寅幸郭崇韜第丙辰黑水遣使者來冬十月癸未左

熊威軍將趙暉妻一產三男子

此亦變異而書者重人事故謹之後世以此為善祥故於亂世書以見不然

十一月

癸卯畋于伊闕丙午至自伊闕

書至見其留四日而荒甚

丁巳回鶻使都督安于想

來十二月庚午及皇后幸張全義第

三年春正月庚子如東京毀卽位壇為鞠場二月己巳聚鞠于新

場乙亥射鴈于王莽河辛巳突厥渾解樓渤海國王大諲譔皆遣

使者來射鴈于北郊乙酉射鴨于郭泊庚寅射鴈于北郊三月乙

未寒食望祭于西郊

俚俗之祭也非禮故書

庚申至自東京辛酉改東京為鄴都

以洛京為東都夏四月乙亥及皇后幸郭崇韜朱漢賓第早庚寅

趙光胤薨五月丁酉皇太妃薨廢朝五日

太祖正室於莊宗為嫡母書太妃及廢朝見亂世禮壞而恩薄

己酉

黑水女真皆遣使者來六月辛未宗正卿李紆為昭宗少帝改卜

園陵使

少帝濟陰王也梁嘗謚曰哀皇帝唐人謂之少帝從其本語

括馬秋七月壬寅皇太后崩

不書冊皇太后已見上注

八月癸未殺河南縣令羅貫九月庚子魏王繼岌為西川四面行

營都統郭崇韜為招討使以伐蜀自六月雨至于是月丁巳射鴈

于尖山冬十月壬午奚吐渾突厥皆遣使者來戊子葬貞簡太后

于坤陵十一月丁未高麗遣使者來己酉蜀王衍降

唐兵入蜀不攻不戰皆臣迎降故直書其

實以見下書郭崇韜殺王宗弼及其弟宗渥宗訓滅其族十二月己卯

敗于白沙癸未至自白沙閏月辛亥封弟存美為邕王存霸永王

存禮薛王存渥中王存乂睦王存確通王存紀雅王

四年春正月壬戌降死罪以下囚甲子魏王繼岌殺郭崇韜及其

三子于蜀

實皇后劉氏作殺與繼岌使殺崇韜而書繼岌殺首繼岌將兵在外后教非天子命可止而不止

戊寅契丹使梅老鞋

里來庚辰殺其弟睦王存乂及河中護國軍節度使李繼麟滅其

族己酉沙州曹義金遣使者來丙戌回鶻阿咄欲遣使者來丁亥

殺李繼麟之將史武薛敬容唐殷揚師太王景來仁白奉國皆

滅其族二月己丑宣徽南院使李紹宏為樞密使癸巳鄴都軍將

趙在禮反于貝州

反者皆不日獨在禮書曰推迹其心可知爾其事具本傳蓋在禮初無亂心以是日見迫而反爾雖加以大惡之名猶原其本心而與於他反

者於此見凡書人善惡不妄加之也如此

甲午敗于冷泉趙在禮陷鄴都武寧軍節度使李紹

榮討之邢州軍將趙太反東北面招討使李紹真討之甲辰成德

軍節度使李嗣源討趙在禮三月趙太伏誅李嗣源反博州守將

翟建自稱刺史甲子殺王衍滅其族

許其不死降而殺之又滅其族於殺非罪此為甚而書無異辭者前書衍降義自見也

乙丑如汴州壬申次榮澤龍驤指揮使姚彥溫以前鋒軍叛降于

李嗣源入于汴州甲戌至自萬勝

帝至萬勝鎮聞嗣源已入汴州乃還

從馬直指揮使郭從

謙反夏四月丁亥朔皇帝崩

年四十三帝尸為伶人焚之明宗入洛得其骨燼天成元年七月葬之河南新安縣號雍陵至晉避廟諱更曰

伊陵其不書葬與梁太祖同

五代史第六

唐本紀第六

明宗聖德和武欽孝皇帝世本夷狄無姓氏父電為鴈門部將生子邈佶烈以騎射事太祖為人質厚寡言執事恭謹太祖養以為子賜名嗣源梁攻兗鄆朱宣朱瑾來乞師太祖遣李存信將兵三萬救之存信留莘縣不進使嗣源別以兵三千先擊梁兵梁兵解去存信留莘縣久之為羅弘信所襲存信敗走嗣源獨殿而還太祖以嗣源所將騎五百號橫衝都光化三年李嗣昭攻梁邢洛出青山遇葛從周兵嗣昭大敗走梁兵追之嗣源從間道後至謂嗣昭曰為公一戰乃解鞍礪鍬憑高為陣左右指畫梁追兵望之莫測嗣源急呼曰吾取葛公士卒可無動乃馳騎犯之出入奮擊嗣昭繼進梁兵解去嗣源身中四矢太祖解衣賜藥以勞之由是李

光化三年

魏州屯田使
氏周嗣昭

魏州屯田使
氏周嗣昭

橫衝名重四方梁晉相拒于柏鄉梁龍驤軍以赤白馬為兩陣旗
幟鎧仗皆如馬色晉兵望之皆懼莊宗舉鍾以飲嗣源曰卿望梁
家赤白馬懼乎雖吾亦怯也嗣源笑曰有其表爾翌日歸吾廐也
莊宗大喜曰卿當以氣吞之因引鍾飲醕奮槌馳騎犯其白馬挾
二裨將而還梁兵敗以功拜代州刺史莊宗攻劉守光嗣源及李
嗣昭將兵三萬別出飛狐定山後取武媯儒三州莊宗已平魏州
因徇下磁相拜相州刺史昭德軍節度使久之徙鎮安國契丹攻
幽州莊宗遣嗣源與閻寶等擊走之同光元年徙鎮橫海是時梁
唐相拒于河上李繼韜以潞州叛降梁莊宗有憂色召嗣源帳中
謂曰繼韜以上黨降梁而梁方急攻澤州吾出不意攻其鄆州以
斷梁右臂可乎嗣源對曰夾河之兵久矣苟非出奇則大計不決
臣請獨當之乃以步騎五千涉濟至鄆州鄆人無備遂襲破之即

拜天平軍節度使蕃漢馬步軍副都總管梁軍攻破德勝南柵莊
宗退保楊劉王彥章急攻鄆州莊宗悉軍救之嗣源為前鋒擊敗
梁軍追至中都擒彥章及梁監軍張漢傑彥章雖敗而段凝悉將
梁兵屯河上莊宗未知所嚮諸將多言乘勝以取青齊嗣源曰彥
章之敗凝猶未知使其聞之遲疑定計亦須三日縱使料吾所向
亟發救兵必渡黎陽數萬之眾舟楫非一日具也此去汴州不數
百里前無險阻方陣而行信宿可至汴州已破段凝豈足顧哉而
郭崇韜亦勸莊宗入汴莊宗以為然遣嗣源以千騎先至汴州攻
封丘門王瓚開門降莊宗後至見嗣源大喜手攬其衣以頭觸之
曰天下與爾共之拜中書令二年莊宗祀天南郊賜以鐵券五月
破楊立于潞州六月徙鎮宣武兼蕃漢內外馬步軍總管冬契丹
侵漁陽嗣源敗之于涿州三年徙鎮成德莊宗幸鄴請朝行在不

凡七年除是歲
元四年而云
四年也

許貞簡太后疾請入省又不許太后崩請赴山陵許之而契丹侵邊乃止十二月遂朝于洛陽

天成元年實同光四年而書天成元年者大赦改元文見下可知莊宗本紀自書同光四年各從其所稱既曰改元不嫌二號也郭崇韜朱友謙

皆以讒死嗣源以名位高亦見疑忌趙在禮反於魏大臣皆請遣

嗣源討賊莊宗不許羣臣屢請莊宗不得已遣之三月壬子嗣源

至魏屯御河南在禮登樓謝罪甲寅軍變嗣源入于魏與在禮合

夕出止魏縣丁巳以其兵南遣石敬瑭將三百騎為先鋒嗣源行

過鉅鹿掠小坊馬三千匹以益軍壬寅入汴州四月丁亥莊宗崩

巴丑入洛陽甲午監國朝羣臣于興聖宮乙未中門使安重誨為

樞密使殺元行欽及租庸使孔謙壬寅左驍衛大將軍孔循為樞

密使丙午始奠于西宮日始奠見其緩也自巳皇帝即位于樞前樞前即位嗣

逆之臣自立而用嗣君之禮書從其實而不變文者蓋先已書反易斬練以袞冕既用嗣

明宗即位

矣遷釋練而服冕壬子魏王繼岌薨諸王薨不書此書者見明宗舉兵實反會從謙欲逆遂

甲寅大赦改元渤海國王大諲譔使大陳林來是月張居翰罷五

月丙辰朔太子賓客鄭珏工部尚書任圜為中書侍郎同中書門

下平章事戊辰趙在禮為義成軍節度使在禮始亂誅而明宗因之以六月

丁酉汴州控鶴軍亂指揮使張諫殺其權知州事高逖己亥諫伏

誅秋七月庚申安重誨殺殿直馬延于御史臺門御史臺所以糾百官之

契丹使梅老述骨來渤海使大昭佐來己卯貶豆盧革為辰州刺


史韋說淑州刺史甲申流革于陵州說于合州八月乙酉朔陝州

碭石縣民高存妻一產三男子丁酉以象笏三十二賜百官之無

笏者是時朝廷衰閏稼于冷泉宮己亥契丹寇邊丁未平盧軍節度使

霍彥威殺其登州刺史王公儼甲寅醫官張志忠為太原少尹九

月己未幸至德宮及袁建豐第冬十月丁亥雲南山後雨林百蠻



都鬼主右武衛大將軍李卑晚使大鬼主傅能何華來辛丑契丹使沒骨餒來告阿保機哀廢朝三日旱辛亥雨

一年春正月癸丑朔更名會癸亥端明殿學士兵部侍郎馮道大常卿崔協為中書侍郎同中書門下平章事二月壬午朔新羅使

張芬來西川節度使孟知祥殺其兵馬都監李嚴丙申赦京師囚郭從謙為景州刺史既而殺之從謙弒君不討而命以官故書與在禮同罪宜誅而書殺者明宗亦同罪不得行誅故以兩相殺書

之戊戌山南東道節度使劉訓為南道招討使以伐荆南是時荆南自絕於中國而附吳

不以有罪書討而書伐見非內臣不責其放三月壬子朔幸會節園羣臣買宴遊幸若不過度則小事也皆不書惟莊宗及晉

出帝之世則書者著其過度耳明宗於五代為勸儉之君遊幸無過度此書已其買宴見君臣之災矣盧臺軍亂殺其將烏震新羅使林彥來夏四月庚寅盧臺軍將龍暉等伏誅六月丙戌任圜罷庚子幸白司馬坡祭突厥神夷狄之事也秋七月甲子隨州刺史西方鄴取夔忠萬州癸酉殺豆盧革韋說八月乙酉祥河使宋朝化及昆明

使者來九月庚午党項使如連山來壬申契丹使梅老來冬十月

乙酉如汴州宣武軍節度使朱守殷反馬步軍都指揮使馬彥超

死之己丑守殷自殺不書克汴州者天子自以兵討未嘗攻戰直入其城也他自殺不書為書克州此不書克州故書自殺乙未殺太

子少保致仕任圜實安重誨矯詔殺之不書重誨殺者明宗知而不責久下詔書誣圜以罪故以明宗自殺書之辛丑德音釋輕

繫囚是月傳箭于霍彥威夷狄之事也十一月乙亥契丹使梅老來十二

月己丑回鶻西界吐蕃遣使者來甲辰叟于東郊丙午追尊祖考

為皇帝妣為皇后高祖聿謚曰孝恭廟號惠祖祖妣劉氏謚曰孝

恭昭曾祖敖謚曰孝質廟號毅祖祖妣張氏謚曰孝質順祖琰謚

曰孝靖廟號烈祖祖妣何氏謚曰孝靖穆考謚曰孝成廟號德祖

妣劉氏謚曰孝成懿立廟于應州

三年春正月丁巳契丹陷平州二月辛巳吐渾都督李紹虜來乙

未孔循罷戊戌回鶻使李阿山來三月丁未朔御札求直言己未

鄭珏罷癸亥成德軍節度使王建立為尚書右僕射同中書門下
平章事西方鄴克歸州戊辰宣徽南院使范延光為樞密使夏四
月戊寅延光罷乙酉達觀遣使者來義武軍節度使王都反壬寅
歸德軍節度使王晏球為北面行營招討使五月契丹禿餒入于
定州辛酉右衛上將軍趙敬怡為樞密使封回鶻可汗王仁裕為
順化可汗秋七月己未殺齊州防禦使曹廷隱八月盧龍軍節度
使趙德鈞執契丹首領惕隱赫邈慶州防禦使竇廷琬反冬十月
靜難軍節度使李敬周討之丁巳突厥使張慕晉來十一月壬午
吐渾使念九來甲午王建立罷十二月李敬周克慶州竇廷琬伏
誅辛亥幸康義誠第

四年春正月壬辰回鶻使掣撥都督來二月癸卯王晏球克定州

王都自焚故
不書伏誅

辛酉晏球獻馘俘趙敬怡薨丁卯崔協薨庚午至自汴州

三月丙戌殺姪從璨夏四月契丹寇雲州癸丑契丹使撩括梅里
來求禿餒殺之甲寅端明殿學士尚書兵部侍郎趙鳳為門下侍
郎兼工部尚書同中書門下平章事五月己巳朝羣臣賀朔不曰視

賀朔者非禮視朝常事自不書爾五月賀朔出於道家之說自唐以來用
之書之見亂世舉非禮之不急者此禮其後屢行皆不復書者與入閣同乙酉追謚少帝

曰昭宣光烈孝皇帝契丹寇雲州秋七月壬申殺右金吾衛上將
軍毛璋八月乙巳黑水使骨至來丁未吐渾首領念公山來乙卯
党項折遇明來己未高麗王建使張彬來九月癸巳殺供奉官烏
昭遇冬十二月辛丑殺西平縣令李商長興元年春正月丁卯閱
馬于苑辛卯宣徽南院使朱弘昭為大內畱守二月戊戌黑水兀
兒遣使者來乙巳天雄軍節度使石敬瑭為御營使癸丑朝獻于
太微宮甲寅享于太廟乙卯有事于南郊大赦改元三月庚寅立
淑妃曹氏為皇后夏四月戊戌安重誨使河中衙內指揮使楊彥

長興元年宣揚
凡四年

溫逐其節度使從珂壬寅西京留守索自通侍衛步軍指揮使藥
彥稠討之辛亥自通執彥溫殺之彥溫雖有罪有命獲而勿殺自通擅殺之故不書誅而書殺戊午羣臣

上尊號曰聖明神武文德恭孝皇帝辛酉吐蕃首領于撥葛來五

月丁丑回鶻使孽粟祖來庚辰回鶻使安黑連來秋七月壬午訪

莊宗子孫瘞所莊宗子孫而不知瘞所見明宗舉兵不順禍害所維者可哀也於此始求之見事緩而無恩也八月乙未忠武軍

節度使張延朗為三司使三司使始於此而今遂因之壬寅殺捧聖都軍使李行德

十將張儉滅其族吐渾來附封于從榮為秦王戊申海州將王傳

極殺其刺史陳宣叛于吳來降乙卯吐渾康合畢來丙辰封于從

厚為宋王九月壬戌吐蕃使王滿儒來東川節度使董璋反甲申

成德軍節度使范延光為樞密使丁亥石敬瑭為東川行營都招

討使冬十月丁酉始藏冰甲辰驍衛上將軍致仕張筠進助軍粟

乙巳董璋陷閬州殺節度使李仁矩指揮使姚洪死之孟知祥反

十一月庚申朔秦王從榮受冊謁于太廟冊禮廢于亂世至此始一行之故書丙戌契丹東

丹王突欲來奔夷狄不可以禮義責故不曰叛于契丹十二月丁未二王後秘書丞鄴國公

楊仁矩卒廢朝一日丁巳回鶻順化可汗王仁裕使翟末斯來安

重誨討董璋不命將名直以樞密使往沙州曹義金遣使者來

二年春正月戊辰党項使折七移來庚辰達鞠使列六薛孃居來

二月丁酉幸安元信第戊戌突厥使杜阿熟吐渾使康萬琳來辛

丑安重誨罷三月趙鳳罷丁亥太常卿李愚為中書侍郎同中書

門下平章事夏四月甲辰宣徽北院使趙延壽為樞密使甲寅董

璋陷遂州武信軍節度使夏魯奇死之乙卯以旱赦流罪以下囚

閏五月丁酉殺太子太師致仕安重誨及其妻張氏子崇質崇緒

秋八月己未契丹使邪姑兒來九月丁亥放五坊鷹隼冬十一月

戊申吐蕃遣使者來辛丑旌表棣州民邢釗門閭于戈之世王道息而禮義亡民猶有自知孝悌

而時君旌之猶有勸民之意故兩善而書之

十二月甲寅朔除鐵禁初稅農具錢

至今因之故書

已未西

京府遣使者來已巳回鶻使安永思來辛未渤海使文成角來党項寇方渠

三年春正月庚子契丹使拽骨來已酉渤海回鶻皆遣使者來二月已卯靜難軍節度使藥彥稠及党項戰于牛兒谷敗之三月甲申契丹遣使者來夏四月庚申新羅遣使者來五月已丑二王後詹事司直楊延紹襲封鄴國公丙午孟知祥攻董璋陷綿州六月甲寅封王建為高麗國王大義軍使孟知祥殺董璋陷東川達靺首領頡哥以其族來附秋八月已卯吐蕃遣使者來冬十月庚申幸石敬瑭第

四年春正月庚寅端明殿學士兵部侍郎劉昫為中書侍郎同中書門下平章事二月戊午孟知祥使朱滉來

十國外而不書此書者知祥本唐臣而反至此改過自歸絕之

則嫌不許其自新錄之則尚冀其遷善然其來也臣禮不備故如夷狄書之

三月甲辰追冊晉國夫人夏氏為皇后

夏五月戊寅封子從珂為愍王

從珂非子而書子與梁博王友文同

從光許王姪從溫充

王從璋洋王從敏涇王丙戌契丹使述骨卿來秋七月乙未回鶻

都督李末來獻白鶻命放之八月戊申大赦九月戊戌趙延壽罷

山南東道節度使朱弘昭為樞密使冬十月庚申范延光罷三司

使馮贇為樞密使壬申幸十一和亭得疾

書得疾為從

十一月壬辰秦王

從榮以兵入興聖宮不克伏誅

君病不侍疾以兵求立罪當誅故書伏誅其意以謂帝崩矣懼不得立而舉兵自助非反故不書反

乙未侍衛親軍都指揮使康義誠殺三司使孫岳戊戌皇帝崩于

雍和殿

年八十七清泰元年葬河南陽縣號徽陵雖得其死而為賊所葬故不書葬

嗚呼自古治世少而亂世多三代之王有天下者皆數百年其可道者數君而已况於後世邪况於五代邪予聞長老為予言明宗雖出夷狄而為人純質寬仁愛人於五代之君有足稱也嘗夜焚

香仰天而祝曰臣本蕃人豈足治天下世亂久矣願天早生聖人
自初卽位減罷宮人伶官廢內藏庫四方所上物悉歸之有司廣
壽殿火災有司理之請加丹艧喟然歎曰天以火戒我豈宜增以
侈邪歲嘗早已而雪暴出庭中詔武德司宮中無得掃雪曰此天
所以賜我也數問宰相馮道等民間疾苦聞道等言穀帛賤民無
疾疫則欣然曰吾何以堪之當與公等作好事以報上天吏有犯
賊輒寘之死曰此民之蠹也以詔書褒廉吏孫岳等以風示天下
其愛人恤物蓋亦有意於治矣其卽位時春秋已高不邇聲色不
樂遊畋在位十年於五代之君最爲長世兵革粗息年屢豐登生
民實賴以休息然夷狄性果仁而不明屢以非辜誅殺臣下至於
從榮父子之間不能慮患爲時以而變起倉卒陷之以大惡帝亦
由此飲恨而終當是時大理少卿康澄上疏言時事其言曰爲國

家者有不足懼者五深可畏者六三辰失行不足懼天象變見不
足懼小人訛言不足懼山崩川竭不足懼水旱蟲蝗不足懼也賢
士藏匿深可畏四民遷業深可畏上下相徇深可畏廉耻道消深
可畏毀譽亂真深可畏直言不聞深可畏也識者皆多澄言切中
時病若從榮之變任圜安重誨等之死可謂上下相徇而毀譽亂
真之敝矣然澄之言豈止一時之病凡爲國者可不戒哉

五代史第七

唐本紀第七

天成二年

三年

明長興元年

四年

愍帝即位

燕川七廟
氏圖兩廟

愍皇帝明宗第五子從厚也為人形質豐厚寡言好禮明宗以其貌類已特愛之天成二年以檢校司徒拜河南尹判六軍諸衛事加檢校太保同中書門下平章事從厚妃孔循女也安重誨怒循以女妻從厚三年罷循樞密使出從厚為宣武軍節度使明年徙鎮河東長興元年封從厚宋王徙鎮成德二年徙鎮天雄累加兼中書令四年十一月秦王從榮伏誅明宗病甚遣宦者孟漢瓊召王于鄴而明宗崩秘其喪六日十二月癸卯朔發喪于西宮皇帝即位于柩前羣臣見于東階復于喪位丙午成服于西宮

二代五君於此始見嗣君即位服喪之事先君得其終嗣君得其始而免禍亂於臣民於篡亂之世稀見之事也故特詳書之

庚戌登光政門樓存問軍民辛亥殺司衣王氏癸丑始聽政乙卯殺司儀康氏丁巳馮道為大行皇

帝山陵使戶部尚書韓彥輝為副中書舍人王延為判官禮部尚書王權為禮儀使兵部尚書李鏘為鹵簿使御史中丞龍敏為儀仗使左僕射權判河南府盧質為橋道頓遞使丁卯禪

應順元年春正月壬申朔視朝于廣壽殿禮也乙亥契丹使都督沒辣于來戊寅大赦改元用樂回鶻可汗王仁美遣使者來沙州瓜州遣使者來乙未朱弘昭馮贊獻錢助作山陵閏月丙午冊皇太后不書姓氏不曰冊某人為皇太后者母尊不可斥其事自見於傳也甲寅冊太妃王氏北京留守石敬瑭獻銀絹助作山陵二月庚寅視作山陵鳳翔節度使潞王從珂反辛卯西京留守王思同為西面行營都部署靜難軍節度使藥彥儔為副三月丙辰思同兵潰嚴衛指揮使尹暉羽林指揮使楊思權以其軍叛降于從珂辛酉殺侍衛親軍馬軍都指揮使朱弘實癸亥河陽三城節度使康義誠為鳳翔行營都招討使王思同為副西

京副留守劉遂雍叛降于從珂思同奔歸于京師不克死之丁卯京城巡檢使安從進叛殺馮贊朱弘昭自殺從進傳其二首于從珂戊辰如衛州不書帝崩者當於廢帝紀書弒鄂王也廢帝鎮州平山人也本姓王氏其世微賤母魏氏少寡明宗為騎將過平山掠得之魏氏有子阿三已十餘歲明宗養以為子名曰從珂及長狀貌雄偉謹信寡言而驍勇善戰明宗甚愛之自晉兵戰梁于河上從珂常立戰功莊宗呼其小字曰阿三不徒與我同年其敢戰亦類我同光二年為衛州刺史突騎指揮使戍于石門明宗討趙在禮自魏反兵而南從珂率戍兵自曲陽孟縣馳出常山以追明宗明宗之南也兵少得從珂兵在後而軍聲大振明宗入立拜從珂河中節度使封潞王是時明宗春秋已高王於諸子次最長樞密使安重誨患之乃矯詔河中裨將楊彥溫使圖之王

凡三年除是歲
即應帝應順元年也

閱馬于黃龍莊彥溫即閉門拒之王止于虞鄉以聞明宗召王還京師居之清化里第重誨數請行軍法明宗不聽後重誨見殺乃起王為左衛大將軍西京留守長興三年為鳳翔節度使王子重吉自明宗時典禁兵為控鶴指揮使愍帝即位朱弘昭馮贇用事乃罷重吉兵職出為亳州團練使又徙王為北京留守不降制書而宣授又以李從璋為代初安重誨得罪罷河中以從璋為代而重誨見殺故王益自疑遂據城反愍帝遣王師同會諸鎮兵討之思同戰敗走諸鎮兵皆潰

清泰元年三月丁巳王以兵東庚申次長安西京副留守劉遂雍叛于唐來降甲子次華州執藥彥稠丙寅次靈寶河中安彥威陝州康思立叛于唐來降己巳次陝州康義誠叛于唐來降殺宣徽使孟漢瓊愍帝出居于衛州夏四月壬申入京師馮道率百官迎

王于蔣橋王辭不見入哭于西宮遂見羣臣道拜王答拜入居于

至德宮癸酉以太后令降天子為鄂王命王監國乙亥皇帝即位

丙子率河南民財以賞軍丁丑借民房課五月以賞軍戊寅弒鄂

王義與弒濟陰王同慈州刺史宋令詢死之乙酉大赦改元戊子殺康義誠及

藥彥儔義誠叛于愍帝罪官曰誅而廢帝同惡相殺故書殺五月丙午端明殿學士左諫議大夫韓

昭胤為樞密使莊宅使劉延朗為樞密副使庚戌馮道罷天雄軍

節度使范延光為樞密使甲寅賜勸進選人宗子官六月庚辰幸

范延光及索自通策秋七月辛亥太常卿盧文紀為中書侍郎同

中書門下平章事丁巳立沛國夫人劉氏為皇后八月辛未尚書

左丞姚顛為中書侍郎同中書門下平章事許御署官選御署官疑是廢帝初舉兵

時所置之官以其非吏部正授故須有旨方得選此於廢帝初舉兵

事無勸戒不必書以舊史不詳故存所不知慎傳疑也九月契丹寇邊冬十月戊寅

李愚劉昫罷十二月己亥雄武軍節度使張延朗為中書侍郎同

中書門下平章事契丹寇雲州庚寅幸龍門早

二年春二月甲戌范延光罷巳丑追尊魯國太夫人魏氏為皇太

后非嫡母故詳其爵氏三月辛丑忠武軍節度使趙延壽為樞密使夏五月辛卯

宣徽南院使劉延皓為樞密使契丹寇邊六月癸未羣臣獻添都

馬都者軍伍之名秋七月丁酉回鶻可汗王仁美使其都督陳福海來劉延

皓罷九月巳酉刑部尚書房嵩為樞密使乙卯渤海遣使者來

三年春正月乙未百濟遣使者來丁未封子重美為雍王三月丙

午翰林學士禮部侍郎馬胤孫為中書侍郎同中書門下平章事

河東節度使石敬瑭反夏五月乙卯建雄軍節度使張敬達為太

原四面都招討使義武軍節度使楊光遠為副戊申先鋒指揮使

安審信叛降于石敬瑭巳酉振武戍將安重榮叛降于敬瑭壬子

天雄軍屯駐捧聖都虞候張令昭逐其節度使劉延皓六月癸亥

以令昭為右千牛衛將軍權知天雄軍事他命官不書以此書甲戌宣武軍節度使范延光為天雄軍四面招討使秋七月戊申克魏州壬

子張令昭伏誅癸丑彰聖指揮使張萬迪叛降于石敬瑭八月戊

午契丹使梅里來九月甲辰張敬達及契丹戰于太原收績契丹

圍敬達于晉安戊申如河陽冬十月壬戌括馬籍民為兵十一月

戊子盧龍軍節度使趙德鈞為行營都統丁酉契丹立晉閏月甲

子楊光遠殺張敬達以其軍叛降于契丹敬達不書死之而書殺者敬達大將宜以義責光遠而誅之雖不果而見

殺猶為得死乃諷光遠殺巳以叛故書之如其志甲戌契丹及晉人至于潞州丁丑至自河陽辛巳

皇帝崩年五十三帝自焚死晉高祖命葬其殮骨於徽陵域中

嗚呼君臣之際可謂難哉蓋明者慮於未萌而前知暗者告以將

及而不懼故先事而言則雖忠而不信事至而悔其可及乎重誨

區區獨見路王之禍而謀之不臧至於殞身赤族其隙自茲及愍

帝之亡也穴于微陵其土一墮路人見者皆爲之悲使明宗爲有知其有媿於重誨矣哀哉

五代史第七終

西川屯鳳
氏開四南市

五代史第八
晉本紀第八

西川屯鳳
氏開四南市

高祖聖文章武明德孝皇帝其父臬捩鷄本出於西夷自朱邪歸唐從朱邪入居陰山其後晉王李克用起於雲朔之間臬捩鷄以善騎射常從晉王征伐有功官至洛州刺史臬捩鷄生敬瑭其姓石氏不知其得姓之始也敬瑭爲人沈厚寡言明宗愛之妻以女是爲永寧公主由是常隸明宗帳下號左射軍莊宗已得魏梁將劉鄩急攻清平莊宗馳救之兵未及陣爲鄩所掩敬瑭以十餘騎橫槊馳擊取之以旋莊宗拊其背而壯之手啗以酥啗酥爽狄所重由是名動軍中十五年莊宗戰於胡柳前鋒周德威戰死敬瑭以左射軍從明宗復擊敗梁兵明宗戰胡盧套楊村爲梁兵所敗敬瑭常脫明宗於危趙在禮之亂明宗討之至魏而兵變明宗初

欲自歸於天子明已所以不反者敬瑭獻計曰豈有軍變於外上將獨無事者乎且猶豫者兵家大忌不如速行願得騎兵三百先攻汴州夷門天下之要害也得之可以成事明宗然之與之驍騎三百渡黎陽爲前鋒明宗遂入汴莊宗自洛後至不得入而兵皆潰去莊宗西還明宗以敬瑭爲前鋒趣汜水且收其散卒莊宗遇弑明宗入立拜敬瑭保義軍節度使賜號竭忠建策興復功臣兼六軍諸衛副使在陝爲政以廉聞是時諸侯多不奉法鄧州陶玘亳州李鄴皆以賊污論死明宗下詔書褒廉吏普州安崇阮洛州張萬進耀州孫岳等以諷天下而以敬瑭爲首天咸二年十月從幸汴州爲御營使拜宣武軍節度使侍衛親軍馬步軍都指揮使六軍副使如故改賜耀忠匡定保節功臣三年四月徙鎮天雄拜同中書門下平章事興唐尹五月拜駙馬都尉韋璋反東川爲行

營都招討使不克而還復兼六軍諸衛副使徙鎮河陽三城未行而契丹吐渾突厥皆入寇是時秦王從榮統六軍敬瑭疑其必及禍不欲爲其副乃自請行及制出不落副使輒復辭行明宗數責大臣問誰可行者范延光趙延壽等卒以敬瑭爲請乃拜河東節度使大同彰國振武威塞等軍蕃漢馬步軍總管落六軍副使乃行明年明宗崩愍帝卽位加中書令三月徙鎮成德清泰元年五月復鎮太原來朝京師潞王從珂反於鳳翔愍帝出奔遇敬瑭于道敬瑭殺帝從者百餘人幽帝于衛州而去廢帝卽位疑敬瑭必反

天福元年五月徙鎮天平敬瑭果不受命謂其屬曰先帝受吾太原使老焉今無故而遷是疑吾反也且太原地險而粟多吾當內撤諸鎮外求援於契丹可乎桑維翰劉知遠等共以爲然乃上表

凡六年
除是歲
三年也
唐廢帝清泰

論廢帝不當立請立許王從益為明宗嗣廢帝下詔削奪敬瑭官爵命張敬達等討之敬瑭求援於契丹九月契丹耶律德光入自

鴈門與唐兵戰敬達大敗敬瑭夜出北門見耶律德光約為父子

十一月丁酉皇帝即位於廢帝本紀書契丹立晉據所見也於此書皇帝即位以自立為文原其心也晉高祖之反無契丹之功亦必自立蓋其志在

於為帝故使自任其惡也

國號晉以幽涿薊檀順瀛漠蔚朔雲應新媯儒武寰州入

于契丹已亥大赦改元掌書記桑維翰為翰林學士尚書禮部侍

郎知樞密使事閏月丙寅翰林學士承旨尚書戶部侍郎趙瑩為

門下侍郎桑維翰為中書侍郎同中書門下平章事兼樞密使甲

戌趙德鈞及其子延壽叛于唐來降契丹鏢之以歸已卯次河陽

節度使萇從簡叛于唐來降是日廢帝猶在辛巳至自太原盧文紀姚顛罷

甲申大赦殺張延朗劉延朗赦房嵩十二月乙酉如河陽追降王

從珂為庶人

王從珂從晉人本語

丁亥司空馮道兼門下侍郎同中書門下平章

事已丑曹州指揮使石重立殺其刺史鄭玩辛卯御札求直言癸

巳鎮州牙內都虞侯祕瓊逐其節度副史李彥珂同州裨將門鐸

殺其將楊漢賓庚子天平軍節度使王建立殺其副使李彥贊早

二年春正月癸亥安遠軍節度使盧文進叛降於吳丁卯天雄軍

節度使范延光殺齊州防禦使祕瓊戊寅兵部侍郎李崧為中書

侍郎同中書門下平章事樞密使封唐宗室子為公及隋鄴公為

二王後以周介公備三恪

唐宗室子史失其名書之以見二王後三恪猶存不必著其人也

二月丁酉契丹

使皇太子解里來三月庚辰如汴州夏四月丁亥赦囚蠲民租賦

趙瑩使于契丹辛卯宣武軍節度使楊光遠進助國錢契丹使宮

苑使李可興來五月壬戌御札求直言丁丑追尊祖考為皇帝妣

為皇后高祖璟謚曰孝安廟號靖祖妣秦氏謚曰孝安元曾祖

彬謚曰孝簡廟號肅祖妣安氏謚曰孝簡恭祖昱謚曰孝平廟

號睿祖祖妣來氏謚曰孝平獻考紹雍謚曰孝元廟號獻祖妣何氏謚曰孝元懿六月癸未契丹使夷離畢來天雄軍節度使范延光反丁酉傳箭于義成軍節度使符彥饒丁未楊光遠為魏州四面行營都部署東都巡檢張從賓反留守判官李遐死之奉國都指揮使侯益護聖都指揮使杜重威討之從賓寇河陽殺皇子重又寇河南殺皇子重信秋七月從賓陷汜水關殺巡檢使宋廷浩壬子右衛大將軍尹暉叛奔于吳不克伏誅右監門衛大將軍婁繼英叛降于張從賓義成軍亂殺戍將侍衛馬步軍都指揮使白奉進甲寅戍將奉國指揮使馬萬執符彥饒歸于京師命殺之于赤崗彥饒雖有縱軍之罪被誣以反而見殺故不書誅曰命殺嫌其縱殺乙卯楊光遠為魏州行營都招討使辛酉杜重威克汜水關張從賓與河死故不書誅壬申楊光遠克博州丙子安州屯防指揮使王暉殺其節度使周環右衛上將軍李金全討之金全未至而暉

走見殺故不書暉反不書克安州不書暉誅八月丙申靜難軍節度使安叔干進添都馬乙巳赦非死罪囚及張從賓符彥饒王暉餘黨九月楊光遠進粟冬十月辛巳禁造甲兵

三年春二月戊戌諸鎮皆進物以助國殘民以獻其上君臣同欲賄路公行至此而不勝其多矣故總言諸鎮此後不復書

二月壬戌回鶻可汗王仁美使翟全福來丁丑禁私造銅器秋七月辛酉以皇業錢作受命寶作寶不必書皇業錢者私錢也天子畜私錢故書八月戊寅馮道

及左僕射劉昫為契丹冊禮使壬午澶州刺史馮暉降丙戌許御署官選已丑蠲水旱民稅辛丑歸伶官于契丹高祖以父事契丹其有所求不曰與而曰歸者若輸之也

九月己酉赦范延光初延光請降高祖不許延光遂堅壁攻之久不克卒悔而赦之故不書降已未歸靜鞭官劉守

威金吾勸契官王殷司天鷄叫學生殷暉于契丹于闐使馬繼榮來回鶻使李萬金來已巳赦魏州蠲民稅是月宣徽南院使劉處讓為樞密使冬十月戊寅契丹使中書令韓頰來奉冊曰英武明

義皇帝庚辰升汴州為東京以洛陽為西京雍州為晉昌軍戊子
右金吾衛大將軍馬從斌使于契丹已未契丹使梅里來戊戌大
赦庚子封李聖天為大寶于闐國王十一月辛亥升廣晉府為鄴
都壬戌除鑄錢令十二月丙子封子重貴為鄭王

四年春正月盜發唐愍皇帝墓

愍帝附于明宗徽陵城中無陵名故曰墓晉高祖即位追謚為愍皇帝五代諸帝謚號不可為法皆

不足道惟愍帝宜者嫌晉降為鄂王也而國亡禮闕舊史實錄皆無秦諱上冊月日故難當書此不得因事而見於此爾

辛亥澶州防禦使張從

恩為樞密副使旌表深州民李自倫門閭三月乙巳回鶻使其都
督拽里敦來丙辰頒調元歷靈州戍將王彥忠以懷遠城反已未
彥忠降供奉官齊延祚殺之夏四月辛巳封回鶻可汗王仁美為
奉化可汗甲申廢樞密使秋七月丙辰復禁鑄錢閏月壬申桑維
翰罷八月己亥朔河決博平西戎寇涇州彰義軍節度使張彥澤
敗之執其首領野離羅蝦獨九月丁丑契丹使粘木孤來癸未封

李從益為郇國公以奉唐後丙戌高麗王建使其廣評侍郎邢順
來冬十二月乙亥立唐高祖太宗莊宗明宗愍帝廟于西京戊子
契丹使遥折來吐蕃罷延族來附

五年春正月丁卯朔德音除民公私債己丑回鶻使石海金來夏
四月甲子契丹興化王來五月丙戌安遠軍節度使李金全叛附
于唐六月癸卯李昇遣其將李承裕入于安州金全奔于唐安遠
軍節度使馬全節及承裕戰敗之丁巳克安州承裕奔于雲夢全
節執而殺之秋八月丁酉閱稼于西郊己未西京留守楊光遠殺
太子太師范延光九月丁卯翰林學士承旨戶部侍郎和凝為中
書侍郎同中書門下平章事辛巳閱稼于沙臺冬十月丁未契丹
使舍利來十一月丙子冬至始用二舞

六年春正月戊寅封唐叔虞為興安王臺駘為昌寧公二月戊申

停買宴錢三月除民二年至四年以前稅見時斂重而民不堪夏四月巳未契丹使述括來五月吐渾首領白承福來秋七月壬午突厥使薛同海來八月壬辰如鄴都開封尹鄭王重貴留守東京宣徽南院使張從恩東京內外兵馬都監壬寅大赦甲寅光祿卿張澄使于契丹九月乙亥前安國軍節度使楊彥詢使于契丹丁丑吐渾使白可久來河決中都入于沓河冬十月河決滑濮鄆澶州山南東道節度使安從進反十一月丁丑西京留守高行周爲南面軍前都部署以討之十二月丙戌朔鄭王重貴爲廣晉尹徙封齊王先鋒都指揮使郭海金及安從進戰于唐州敗之成德軍節度使安重榮反天平軍節度使杜重威爲鎮州行營招討使丙申契丹遣使者來戊戌杜重威及安重榮戰于宗城敗之七年春正月丁巳克鎮州安重榮伏誅赦廣晉庚午契丹使達刺

來三月歸德軍節度使安彥威塞決河于滑州閏月天興蝗食麥

夏五月乙巳尊皇太妃劉氏爲皇太后高祖所生母也六月丙辰吐渾使念

醜漢來乙丑皇帝崩于保昌殿年五十二

五代史第八終

五代史第九

晉本紀第九

出帝父敬儒高祖兄也為唐莊宗騎將早卒高祖以其子重貴為
 子高祖六子五皆早死而重睿幼故重貴得立重貴少而謹厚善
 騎射高祖使博士王震教以禮記久之不能通大義謂震曰此非
 我家事也高祖為契丹所立謀以一子留守太原契丹使盡出諸
 子自擇之指重貴曰此朕大者可也遂拜金紫光祿大夫行太原
 尹北京留守知河東節度事天福二年九月召拜左金吾衛上將
 軍三年冬為開封尹封鄭王加太尉同中書門下平章事六年高
 祖幸鄴留守東京已而為廣晉尹徙封齊王
 七年六月乙丑高祖崩皇帝即位于柩前庚午使左驍衛將軍石
 德超以御馬二撲祭于相州之西山

夷狄之禮也

如京師使李仁廓使于

燕川宅鳳臺
氏閣何州市

燕川宅鳳臺
氏閣何州市

契丹契丹使梅里來丙子馮道為大行皇帝山陵使門下侍郎竇

貞固為副太常卿崔悅為禮儀使戶部侍郎呂琦為鹵簿使御史

中丞王易簡為儀仗使舊史實錄無備道顯遷使疑不置或闕書漢高祖亦然已卯四方館使宋崇節

右金吾衛大將軍梁言使于契丹秋七月壬辰皇祖母劉氏崩輟

視朝三日高祖所生母也高祖時尊為皇太后矣其崩也喪葬不用后禮見恩禮之薄不書曰皇太后者於帝為祖母也曰崩正其名也丁酉使石德

超撲馬于相州之西山前已備見故文皆庚子大赦甲辰契丹使通事來八月

戊午高行周克襄州安從進自焚死故不書伏誅庚申天平軍節度使景延廣義成

軍節度使李守貞彰德軍節度使郭謹進錢粟助作山陵甲子契

丹使郎五來庚午葬皇祖母於魏縣癸酉契丹使其客省使張九

思來九月辛丑李守貞為大行皇帝山陵都部署冬十月己未契

丹使舍利來庚午回鶻遣使者來十一月契丹使大卿來庚寅葬

聖文章武孝皇帝于顯陵陵在河南壽安縣五代之亂至此七君而不得其死者五明宗雖善終而感帝不克葬至廢帝時始克葬故皆不書

至此始見子得葬其父故并附廟詳書之已亥牛羊使董殷使于契丹庚子附高祖神主于太

廟辛丑蠲高祖靈車所過民租之半十二月庚午北京留守劉知

遠進百頭穹廬穹廬夷狄之用也契丹于越使令骨支來辛未又使野里已來

丙子于闐使都督劉再昇來沙州曹元深瓜州曹元忠皆遣使者

附再昇以來旱蝗

八年春正月契丹于越使烏多與來二月壬子景延廣為御營使

已未如東京赦廣晉府囚庚申次澶州赦囚乙丑至自鄴都庚午

寒食望祭顯陵于南莊焚御衣紙錢焚天野祭之類皆閭巷人之事也川之天子見禮樂壞甚二月己卯

朔趙瑩罷晉昌軍節度使桑維翰為侍中辛丑引進使太府卿孟

承誨使于契丹蝗夏四月庚午董殷使于契丹供奉官張福率威

順軍捕蝗于陳州五月泰寧軍節度使安審信捕蝗于中都丁亥

追封皇伯敬儒為宋王癸卯馮道罷甲辰以旱蝗大赦六月庚戌

祭蝗于臯門癸亥供奉官七人帥奉國軍捕蝗于京畿辛未括借民粟殺藏粟者秋七月甲午冊皇太后丁酉射于南莊契丹使梅里等來甲辰供奉官李漢超帥奉國軍捕蝗于京畿八月丁未朔募民捕蝗易以粟辛亥檢民青苗九月戊寅尊秦國夫人安氏為皇太妃丙申幸大年莊及景延廣第冬十月戊申立馮氏為皇后馮氏於帝為叔母壬子畋于近郊幸沙臺丙寅契丹使通事劉胤來庚午括借民粟十一月己卯董殷使于契丹甲申幸八角闕馬牧乙未契丹使梅里來戊戌齊州刺史楊承祚奔于青州辛丑高麗使其廣評侍郎金仁逢來十二月癸丑給事中邊光範登州刺史郭彥威使于契丹甲寅高麗使太相來平盧軍節度使楊光遠反淄州刺史翟進宗死之

開運元年春正月甲戌契丹寇滄州己卯陷貝州庚辰歸德軍

節度使高行周為北面行營都部署契丹入鴈門寇代州辛巳殿

直王班使于契丹至于鄴都不得進而復晉自高祖以父事契丹甚謹而歲時遣使舊史實錄皆不書至出帝立使者皆畧而不書班以不得進故書大饑壬午前靜難軍節度使李周留守東京

景延廣為御營使乙酉北征丙戌契丹寇黎陽辛卯講武于澶州

契丹屯于元城趙延壽寇南樂甲午劉知遠為幽州道行營招討

使括馬丙申契丹寇黎陽辛丑劉知遠及契丹偉王戰于秀容敗

之博州刺史周儒叛降于契丹二月戊申前軍都虞侯李守貞及

契丹戰于馬家渡敗之癸丑北面行營都虞侯馬全節及契丹戰

于北平敗之三月癸酉及契丹戰于戚城契丹去戰而兩各傷失收兵徐去皆不能追故以自去

文已丑冀州刺史白從暉及契丹戰于衡水敗之癸巳籍民為武定

軍夏四月契丹陷德州沿河巡檢使梁進敗之取德州甲寅至自

澶州赦京師己未馬全節及契丹戰于定豐敗之辛酉率借民財

五月戊寅李守貞討楊光遠丁亥鄴都留守張從恩爲貝州行營都部署辛卯李守貞爲青州行營都部署六月克淄州丙午復置樞密使丁未侍中桑維翰爲中書令充樞密使丙辰河決滑州環梁山入于汶濟秋七月辛未朔大赦改元己丑太子太傅劉昫守司空兼門下侍郎同中書門下平章事八月辛丑朔劉知遠爲北面行營都統順德軍節度使杜威爲都招討使戊辰旌表陳州項城民史仁詡門閭九月丙子契丹寇遂城樂壽代州刺史白文珂及契丹戰于七里烽敗之冬十月庚戌武寧軍節度使趙在禮爲北面行營副都統鄴都留守馬全節爲副招討使十二月己亥朔射兔于臯門丁巳楊承勳囚其父光遠以降殺之出帝已許其不死已而命李守貞殺之故不書伏閏月乙酉德音赦青州囚契丹寇恒州二年春正月契丹陷秦州壬子馬全節及契丹戰于榆林兩軍皆

潰戊午幸南莊張從恩留守東都辛酉高行周爲御營使乙丑北征契丹去二月己巳幸黎陽橫海軍節度使田武爲東北面行營都部署以備契丹日以備契丹嫌契丹已去而命將丙子大閱于戚城丙戌閱馬於鐵丘丙申端明殿學士尚書戶部侍郎馮玉爲戶部尚書樞密使三月戊戌契丹陷祁州刺史沈斌死之丁未畋于戚城庚戌馬全節克秦州辛亥易州戍將孫方諫及契丹諧里戰于狼山敗之甲寅杜威克滿城乙卯克遂城庚申杜威及契丹戰于陽城敗之追奔至于衛村又敗之夏四月戊寅勞旋于戚城己卯勞旋于王莽河甲申至自澶州赦左右軍囚庚寅大賞軍功五月丙申朔大赦丙午幸南莊六月丁卯射于繁臺幸杜威第早秋八月甲子朔廢二舞丙寅和凝罷馮玉爲中書侍郎同中書門下平章事辛未閱馬于茂澤陂丁丑括馬九月己亥閱馬于萬龍岡幸李守貞第冬十月

丁丑高麗使其廣評侍郎韓玄珪禮賓卿金廉等來戊寅射免于
硯臺戊子高麗使其兵部侍郎劉崇規內軍卿朴藝言來十一月
戊戌封王武為高麗國王己巳射免于臯門幸沙臺十二月丁丑
臘畋于郊丁亥桑維翰罷開封尹趙瑩為中書令李崧守侍中樞
密使

三年春二月丙子回鶻使突厥陸來壬午射鴨于板橋幸南莊夏
六月孫方諫以狼山叛附于契丹丙寅契丹寇邊己丑李守貞為
行營都部署義成軍節度使皇甫遇為副河決魚池大饑羣盜起
秋七月大雨水河決楊劉朝城武德八月辛酉河溢歷亭九月河
決澶滑懷州辛丑行營馬軍排陣使張彥澤及契丹戰于新興敗
之癸卯劉知遠及契丹戰于朔州敗之大雨霖河決臨黃冬十月
河決衛州丙寅河決原武辛未杜威為北面行營都招討使李守

此紙卷十三之第五葉也

通禮定正樂議刑統其制作之法皆可施於後世其為人明達
英果議論偉然即位之明年廢天下佛寺三千三百三十六是時
中國乏錢乃詔悉毀天下銅佛像以鑄錢嘗曰吾聞佛說以身世
為妄而以利人為急使其真身尚在苟利於世猶必割截况此銅
像豈有所惜哉由是羣臣皆不敢言嘗夜讀書見史元稹出圖
慨然歎曰此致治之本也王者之政自此始乃詔其圖法使吏
民先習知之期以一歲大均天下之田其規為元稹豈小哉其伐
南唐問宰相李穀以計策後克淮南出穀疏使士陶穀為贊而
盛以錦囊嘗置之坐側其英武之材可謂雄傑及其虛心聽納用
人不好豈非所謂賢主哉其北取三關兵不血刃而史家猶譏其
輕社稷之重而僥倖一勝於倉卒殊不知其料強弱較彼我而乘
逆律之殆得不可失之機此非明於決勝者孰能至哉誠非史氏

之所及也

五代史第十二終

五代史第十

漢本紀第十

高祖睿文聖武昭肅孝皇帝姓劉氏初名知遠其先沙陀部人也其後世居于太原知遠弱不好弄嚴重寡言面紫色目多白睛凜如也與晉高祖俱事明宗爲偏將明宗及梁人戰德勝晉高祖馬甲斷梁兵幾及知遠以所乘馬授之復取高祖馬殿而還高祖德之高祖留守北京以知遠爲押衙潞王從珂反愍帝出奔高祖自鎮州朝京師遇愍帝于衛州止傳舍知遠遣勇士石敢袖鐵槌侍高祖以虞變高祖與愍帝議事未決左右欲兵之知遠擁高祖入室敢與左右格鬪而死知遠卽率兵盡殺愍帝左右留帝傳舍而去廢帝入立高祖復鎮河東已而有隙高祖將舉兵知遠與桑維翰密爲高祖謀畫贊成之高祖卽位於太原以知遠爲侍衛親軍

漢本紀第十

都虞侯領保義軍節度使契丹耶律德光送高祖至潞州臨決指
知遠曰此都軍甚操刺世俗謂勇猛為操刺錄其本語無大故勿棄之天福二年遷侍
衛馬步軍都指揮使領忠武軍節度使已而以柱重威代知遠領
忠武徙知遠領歸德知遠耻與重威同制柱門不出高祖怒欲罷
其兵職宰相趙瑩以為不可高祖乃遣端明殿學士和凝就第宣
諭知遠乃受命五年徙鄴都留守九月朝京師高祖幸其第六年
拜河東節度使北京留守七年高祖崩知遠從高祖起太原有佐
命功自出帝立與契丹絕盟用兵北方常疑知遠勲位已高幸晉
多故而有異志每優尊之拜中書令封太原王幽州道行營招討
使又拜北面行營都統開運二年四月封北平王三年五月加守
太尉然王未嘗出兵契丹寇澶州別遣偉王攻鴈門王敗之于秀
容八月殺吐渾白承福等族取其貲鉅萬良馬數千

高祖即位

四年契丹犯京師出帝北遷王遣牙將王峻奉表契丹耶律德光
呼之為兒賜以木柅一木柅虜法貴之如中國几杖非優大臣不
可得峻持柅歸虜人望之皆辟道峻還為王言契丹必不能有中
國乃議建國二月戊辰河東行軍司馬張彥威等上牋勸進辛未
皇帝即位稱天福十二年天福晉高祖年號也天福止八年改元開運至此四年矣漢建國而未有國號又稱晉年號拾開運而追續天福為十二年初無義磁州賊首梁暉取相州來歸變來降曰來歸哀斯人也是時天下無理但書其實爾武節都指揮使史弘肇取代州殺其刺
于此者異矣漢高祖非有德之君惶惶斯人之無所歸者猶得而歸也故曰歸史王暉晉州將藥可儔殺其守將駱從朗及括錢使諫議大夫趙
熙來歸辛巳陝州留後趙暉潞州留後王守恩來歸三月丙戌朔
蜀河東雜稅辛卯延州軍亂逐其節度使周密壬辰丹州指揮使
高彥詢以其州來歸壬寅契丹遜聞漢起太原畏而去故與自去異其文遜者退避之稱以其將蕭翰
為宣武軍節度使守汴州夏四月己未右都押衙楊邠為樞密使

蕃漢兵馬都孔目官郭威權樞密副使契丹陷相州殺梁暉癸亥
立魏國夫人李氏爲皇后甲子河東節度判官蘇逢吉觀察推官
蘇禹珪爲中書侍郎同中書門下平章事乙丑侍衛親軍步軍都
指揮使史弘肇取潞州戊辰奉國指揮使武行德以河陽來歸史
弘肇取澤州丙子契丹耶律德光卒于樂城契丹入于鎮州五月
甲午太原尹劉崇爲北京留守丙申如東京蕭翰遜歸于契丹以
郇國公李從益知南朝軍國事戊申次絳州刺史李從朗來歸六
月丙辰次河陽殺李從益及其母于京師甲子至自太原戊辰改
國號漢高祖初建國無國號蓋其制詔皆無明文故闕不書然稱天福十二年則國仍號晉可知但無明據故慎於所疑爾此書改國號漢則未改之前宜有所稱此可以推知也
赦罪人蠲民稅于闕遣使者來是夏劉昫薨秋閏七月乙丑禁造
契丹服器天雄軍節度使杜重威反杜重威於晉出帝時避出帝名去重至漢而復之天平軍節
度使高行周爲鄴都行營都部署以討之庚辰追尊祖考爲皇帝

妣爲皇后高祖湍謚曰明元廟號文祖祖妣李氏謚曰明貞曾祖
昂謚曰恭僖廟號德祖祖妣楊氏謚曰恭惠祖僕謚曰昭憲廟號
翼祖祖妣李氏謚曰昭穆考典謚曰章聖廟號顯祖祖妣安氏謚曰
章懿以漢高皇帝爲高祖光武皇帝爲世祖皆不祧八月護聖指
揮使白再榮逐契丹以鎮州來歸丙申安國軍節度使薛懷讓殺
契丹之將劉鐸入于邢州九月甲戌吏部尚書竇貞固守司空兼
門下侍郎翰林學士中書舍人李壽爲中書侍郎同中書門下平
章事庚辰北征冬十月甲申次韋城赦河北十一月壬申杜重威
降十二月癸巳至自鄴都乾祐元年春正月乙卯大赦改元己未
更名晉丁丑皇帝崩于萬歲殿年五十四
隱皇帝高祖第二子承祐也高祖卽位拜右衛上將軍大內都點
檢魏王承訓長而賢高祖愛之方屬以爲嗣承訓薨高祖不豫悲

哀疾劇乃以承祐屬諸將相宰相蘇逢吉曰皇子承祐未封王請
亟封之未及封而高祖崩祕不發喪殺杜重威

乾祐元年二月辛巳封承祐周王是日皇帝即位于柩前壬辰右

衛大將軍鳳翔巡檢使王景崇及蜀人戰于大散關敗之癸巳大

赦三月壬戌竇貞固為大行皇帝山陵使吏部侍郎段希堯為副

太常卿張昭為禮儀使兵部侍郎盧價為鹵簿使御史中丞邊蔚

為儀仗使丁丑李濤罷護國軍節度使李守貞反陷潼關夏四月

辛巳陝州兵馬都監王玉克潼關壬午永興軍將趙思綰叛附于

李守貞客省使王峻帥師屯于關西峻不命為將又不令討賊但令楊邠為

中書侍郎兼吏部尚書同中書門下平章事郭威為樞密使鎮寧

軍節度使郭從義為永興軍兵馬都部署戊子保義軍節度使白

文珂為河中兵馬都部署河決原武五月己未回鶻遣使者來乙

亥魏州內黃民武進妻一產三男子河決滑州魚池旱蝗秋七月

戊申朔彰德軍節度使王繼弘殺其判官張易鸚鵡食蝗丙辰禁

捕鸚鵡庚申郭威同中書門下平章事癸亥契丹鄭州刺史王彥

徽來奔庚午殺成德軍副使張鵬乙亥王景崇叛附于李守貞八

月壬午郭威討李守貞九月西面行營都虞侯尚弘遷及趙思綰

戰敗績冬十月甲申吐蕃使斯漫篤蘭氈藥斯來十一月甲寅殺

太子太傅李崧滅其族壬申葬睿文聖武昭肅孝皇帝于睿陵在河南

十二月己卯彰武軍節度使高允權殺太子太師致仕劉景巖

二年隱帝即位至此宜改元而不改元具周顯德二年注而帝名承祐年名乾祐舉春正月

乙巳朔赦囚二月丙子蠲民紐配租夏五月李守貞之將周光遜

降乙丑趙思綰降六月辛卯回鶻首領楊彥珣來西涼府遣使者

來蝗秋七月丁巳郭威殺華州留後趙思綰于京兆甲子克河中

守貞自焚死 故不書伏誅

八月郭從義殺前永興巡檢喬守温丙戌郭威使來獻俘
冬十月契丹寇趙魏羣臣進添都馬契丹陷内丘巳丑郭威及宣
徽南院使王峻伐契丹十一月契丹遁

三年春正月西面行營都部署趙暉克鳳翔景崇自焚死 故不書伏誅丙午郭威進

添都馬壬子趙暉獻馘俘二月甲戌旌表潁州汝陰民趨温門間

三月巳酉寒食望祭于南御園夏四月壬午郭威以樞密使爲天

雄軍節度使六月癸卯河決原武秋八月達鞞來附冬十一月丙

子殺楊邠及侍衛親軍都指揮使史弘肇三司使王帝皆滅其族

郭威反庚辰義成軍節度使宋延渥叛附于威壬午威犯封丘秦

寧軍節度使慕容彥超軍于七里店癸未勞軍于北郊甲申勞軍

于劉子陂慕容彥超及郭威戰敗績開封尹侯益叛降于威郭允

明反乙酉皇帝崩年十周廣順元年葬之許州楊 蘇逢吉自殺漢亡 自隱帝 崩後四

十二日周太祖始即位而斷自帝崩書漢亡必見帝崩而漢已亡矣其六后臨朝湘陰公嗣立皆 周所假託非誠實所以破其姦故書曰漢亡曰周之立進也進而難於自立則猶有自媿之心焉

嗚呼人君卽位稱元年常事爾古不以爲重也孔子未修春秋其

前固已如此雖暴君昏主妄庸之史其記事先後遠近莫不以歲

月一二數之乃理之自然也其謂一爲元亦未嘗有法蓋古人之

語爾古謂歲之一月亦不云一而曰正月國語言六呂曰九開大呂周 易列六爻曰初九大抵古人言數多不一不獨謂一爲元也及後世曲學之

士始謂孔子書元年爲春秋大法遂以改元爲重事自漢以後又

名年以建元而正僞紛雜稱號遂多不勝其紀也五代亂世也其

事無法而不合於理者多矣皆不足道也至其年號乖錯以惑後

世則不可以不明初梁太祖以乾化二年遇弒明年末帝已誅友

珪黜其鳳曆之號復稱乾化三年尚爲有說至漢高祖建國黜晉

出帝開運四年復稱天福十二年者何哉蓋以其愛憎之私爾方

出帝特漢高祖居太原常憤憤下視晉而晉亦陽優禮之幸而未

見其隙及契丹滅晉漢未嘗有赴難之意出帝已北遷方陽以兵
聲言追之至土門而還及其即位改元而黜開運之號則其用心
可知矣蓋其於出帝無復君臣之義而幸禍以爲利者其素志也
可勝歎哉夫所謂有諸中必形於外者其是於是乎

五代史第十終

西川屯田
氏圖

五代史第十一

西川屯田
氏圖

周本紀第十一

太祖聖神恭肅文武孝皇帝姓郭氏邢州堯山人也父簡事晉爲
順州刺史劉仁恭攻破順州簡見殺子威少孤依潞州人常氏潞
州留後李繼韜募勇敢士爲軍卒威年十八以勇力應募爲人負
氣好使酒繼韜特奇之威嘗遊於市市有屠者常以勇服其市人
威醉呼屠者使進几割肉割不如法叱之屠者披其腹示之曰爾
勇者能殺我乎威卽前取刀刺殺之一市皆驚威頗自如爲吏所
執繼韜惜其勇陰縱之使亡已而復召置麾下繼韜叛晉附于梁
後莊宗滅梁繼韜誅死其麾下兵悉隸從馬直威以通書筭補爲
軍吏好讀聞外春秋畧知兵法後爲侍衛軍吏漢高祖爲侍衛親
軍都虞候尤親愛之後高祖所臨鎮嘗以威從契丹滅晉漢高祖

起兵太原卽皇帝位拜威樞密副使

乾祐元年正月高祖疾大漸以隱帝託威及史弘肇等隱帝卽位拜威樞密使是歲三月河中李守貞永興趙思綰鳳翔王景崇相次反隱帝遣白文珂郭從義常思等分討之久皆無功隱帝謂威曰吾欲煩公可乎威對曰臣不敢請亦不敢辭惟陛下命乃加拜威同中書門下平章事使西督諸將威居軍中延見賓客褻衣博帶及臨陣行營幅巾短後與士卒無異上所賜予與諸將會射恣其所取其餘悉以分賜士卒將士皆懽樂威至河中自柵其城東思柵其南文珂柵其西調五縣十二萬人築連壘以護三柵諸將皆以爲守貞窮寇破在旦夕不宜勞人如此威不聽已而守貞數出兵擊壞連壘威輒補之守貞輒復出擊每出必有亡失久之城中兵食俱盡威曰可矣乃治攻具爲期日四面攻之破其羅城守

貞與妻子自焚死忠綰景崇相次降隱帝勞威以玉帶加檢校太師兼侍中威辭曰臣事先帝見功臣多矣未嘗以玉帶賜之因言臣幸得率行旣假漢威靈以破賊者豈特臣之功皆將相之賢有以安朝廷撫內外而饋餉以時故臣得以專事征伐隱帝以威爲賢於是悉召楊邠史弘肇蘇逢吉禹珪竇貞固王章等皆賜以玉帶威乃受又推功大臣請加爵賞於是加貞固司空逢吉司徒禹珪邠左右僕射已而曰此特漢廷親近之臣耳漢諸宗室天下方鎮外暨荆浙湖南皆未及也由是濫賞遍于天下是冬契丹寇邊威以樞密使北伐至魏州契丹遯三年二月師還四月拜威鄴都留守天雄軍節度使仍以樞密使之鎮宰相蘇逢吉以謂樞密使不可以藩鎮兼領與史弘肇等固爭久之卒以樞密使行詔河北諸州皆聽威節度隱帝與李業等謀已殺史弘肇等詔鎮寧軍

五代史卷十一
節度使李弘義殺侍衛步軍指揮使王殷于澶州又詔侍衛馬軍
指揮使郭崇殺威及宣徽使王峻于魏詔書先至澶州弘義恐事
不果反以詔書示殷殷與弘義遣人告威已而詔殺威峻使者亦
馳騎至威匿詔書召樞密使院吏魏仁浦謀於卧内仁浦勸威反
敎威倒用留守印更爲詔書詔威誅諸將校以激怒之將校皆憤
然效甲十一月丁丑威遂舉兵渡河隱帝遣開封尹侯益保大軍
節度使張彥超客省使閻晉卿等率兵拒威又遣内養鷲脫覘威
所嚮鷲脫爲威所得威乃附脫奏請縛李業等送軍中隱帝得威
奏以示業等業等皆言威反狀已白乃悉誅威家屬于京師庚辰
威至滑州義成軍節度使宋延渥叛于漢來降壬午犯封丘甲申
及秦寧軍節度使慕容彥超戰于劉子陂彥超敗奔于兗州郭允
明反弑隱帝于趙村丙戌威入京師縱火大掠戊子率百官朝太

后于明德門請立嗣君太后下令文武百寮六軍將校議擇賢明
以承大統庚寅威率百官詣明德門請立秦寧軍節度使贊爲嗣
遣太師馮道迎贊于徐州辛卯請太后臨朝聽政以王峻爲樞密
使翰林學士尚書兵部侍郎范質爲副使十二月甲午朔威北伐
契丹軍于滑州癸丑至澶州而旋王峻遣郭崇以騎兵七百逆劉
贊于宋州殺之其將鞏延美楊溫爲贊守徐州戊午次臯門漢宰
相竇貞固蘇禹珪來勸進庚申太后制以威監國

廣順元年春正月丁卯皇帝卽位大赦改元國號周己巳上漢太
后尊號曰昭聖皇太后戊寅漢劉崇自立于太原

吳蜀諸國自立皆絕而
不書此書與其不崩于

周語在十
國年譜論己卯馮道爲中書令二月辛丑西州回鶻使都督來丁未契

丹使梟骨支來癸丑寒食望祭于蒲池

蒲池佛
寺名也

丁巳尚書左丞田敏

使于契丹回鶻使摩尼來三月甲戌武寧軍節度使王彥超克徐

大夫誤

州 鞏延美楊溫不書
死之語在晉傳

夏四月甲午立夫人董氏為德妃五月辛未追尊祖

考為皇帝妣為皇后高祖璟謚曰睿和廟號信祖祖妣張氏謚曰

睿恭曾祖諡曰明憲廟號僖祖祖妣申氏謚曰明孝祖諡曰

翼順廟號義祖祖妣韓氏謚曰翼敬考諡曰章肅廟號慶祖妣王

氏謚曰章德六月辛亥范質及戶部侍郎判三司李穀為中書侍

郎同中書門下平章事竇貞固蘇禹珪罷癸丑范質參知樞密院

事丁巳宣徽北院使翟尤鄴為樞密副使秋七月戊寅幸王峻策

八月壬寅契丹來歸趙瑩之喪冬十月丙午漢人來討討加有罪漢之
於周義所得討

攻自晉州云自晉州者見漢兵當誅罪人于京師自晉州
而入耳攻城無得失不書此書者許漢來討十一月王峻及建雄軍

節度使王彥超拒之十二月慕容彥超反

二年春正月甲子侍衛步軍都指揮使曹英為兗州行營都部署

庚午高麗王昭使其廣評侍郎徐逢來二月庚寅府州防禦使折

德展克尙嵐軍三月丁巳朔寒食望祭于郊戊辰內客省使鄭仁

誨為樞密副使翟光鄴罷夏五月庚申東征李穀留守東都鄭仁

誨為大內都點檢癸亥次曹州赦流罪以下囚乙亥克兗州彥超投
井死故

不書壬午赦兗州六月乙酉朔幸曲阜祠孔子庚子至自兗州秋九

乙丑太僕少卿王演使于高麗契丹寇邊

三年春正月乙卯麟州刺史楊重訓叛于漢來附閏月丙戌回鶻

使獨呈相溫來二月甲子貶王峻為商州司馬三月甲申封榮為

晉王不書子者榮於禮不得為子不書子則
當書其本姓又不書者周人所共諱丙戌鄭仁誨罷己丑棣州團練使

王仁鎬為右衛大將軍樞密副使夏六月大雨水秋七月契丹盧

臺軍使張藏英來奔九月吐渾党富達等來冬十月庚申馮道為

奉迎神主使十一月癸未党項使吳帖磨五等來十二月戊申四

廟神主至自西京迎之于西郊祔于太廟壬申殺天雄軍節度使

秋九下脫月字

王殷乙亥享于太廟

顯德元年春正月丙子朔有事于南郊大赦改元羣臣上尊號曰
聖明文武仁德皇帝戊寅罷鄴都丙戌鎮寧軍節度使鄭仁誨爲
樞密使壬辰端明殿學士戶部侍郎王溥爲中書侍郎同中書門
下平章事王仁鎬罷是日皇帝崩于滋德殿

年五十一書是日
連上文嫌無弱日

五代史第十一 終

西川毛鳳麟
氏周周周

五代史第十二

周本紀第十二

西川毛鳳麟
氏周周周

世宗睿武孝文皇帝本姓柴氏邢州龍岡人也柴氏女適太祖是
爲聖穆皇后后兄守禮子榮幼從姑長太祖家以謹厚見愛太祖
遂以爲子太祖後稍貴榮亦壯而器貌英奇善騎射畧通書史黃
老性沉重寡言太祖爲漢樞密使榮爲左監門衛將軍太祖鎮天
雄榮領貴州刺史天雄軍牙內都指揮使乾祐三年冬周兵起魏
犯京師留榮守魏太祖入立拜澶州刺史鎮寧軍節度使檢校太
傅同中書門下平章事榮素爲樞密使王峻所忌廣順三年正月
來朝不得留旣而峻有罪誅三月拜榮開封尹封晉王是冬十以
來年正月朔旦有事于南郊而太祖遇疾不能視朝者久之
顯德元年正月丙子郊僅而成禮卽以王判內外兵馬事壬辰太

祖崩秘不發喪丙申發喪皇帝卽位於柩前

於書封晉王正其非子矣其餘假竊嗣君之禮不待議貶而可

知故皆無異辭

右監門衛大將軍魏仁浦為樞密副使二月庚戌回鶻遣使

者來丁卯馮道為大行皇帝山陵使太常卿田敏為禮儀使兵部

尚書張昭為鹵簿使御史中丞張煦為儀仗使開封少尹權判府

事王敏為橋道頓遞使漢人來討攻自潞州三月辛巳大赦癸未

鄭仁誨留守東京乙酉如潞州以攻漢

不曰伐曲在周不可以大為言故用兩相攻為文

壬辰次澤

州閱兵于北郊癸巳及劉旻戰于高原敗之

與其不屬于周不與其稱帝故書姓名

追及于

高平又敗之丁酉幸潞州巳亥侍衛馬軍都指揮使樊愛能步軍

都指揮使何徽伏誅壬寅天雄軍節度使符彥卿為河東行營都

部署夏四月乙卯葬神聖文武恭肅孝皇帝于嵩陵

在鄭州新鄭縣

汾州防

禦使董希顏叛于漢來附丙辰遼州刺史張漢超叛于漢來附辛

酉取嵐憲州壬戌立衛國夫人符氏為皇后取石沁州乙丑馮道

薨庚午赦潞州流罪以下囚如太原忻州監軍李勅殺其刺史趙

臯叛于漢來附五月丙子代州守將鄭處謙叛于漢來附契丹救

漢丁酉回鶻使因難敵畧來符彥卿及契丹戰于忻口敗績先鋒

都指揮使史彥超死之六月乙巳班師乙丑次新鄭遂拜嵩陵庚

午至自太原秋七月庚辰閱稼于南御莊癸巳樞密院直學士工

部侍郎景範為中書侍郎同中書門下平章事魏仁浦為樞密使

冬十月甲辰殺左羽林大將軍蓋漢瓊

二年

五代亂世以嗣君即位者五而收元不依古者四梁末帝晉出帝即位踰年宜收元而不改又明年然後改漢隱帝則世宗皆仍稱先帝年號終其世不改而本紀無議者但書其

實自見其失也

春二月御札求直言夏五月辛未宣徽南院使向訓鳳翔節

度使王景伐蜀甲戌大毀佛寺禁民親無侍養而為僧尼及私自

度者秋九月丙寅朔頒銅禁閏月癸丑向訓克秦州冬十月辛未

取成州戊寅高麗使王子太相融來取階州十一月乙未朔李穀

五代史卷十二
為淮南道行營都部署以伐唐戊申王景克鳳州十二月丙戌鄭仁誨薨

三年春正月增築京城庚子向訓留守東京壬寅南征辛亥侍衛親軍都指揮使李重進及唐人戰于正陽敗之甲寅重進為淮南道行營都招討使二月丙寅幸下蔡浮橋壬申克滁州甲戌李景來求成不答壬午景使其臣鍾謨來奉表丙戌取揚州辛卯取泰州三月庚子內外馬步軍都頭袁彥為竹龍都部署是月取光舒常州書是月見取三州不同日夏四月常泰州復入于唐五月乙卯至自淮南赦京師囚六月壬申德音赦淮南囚秋七月皇后崩楊光舒滁州復入于唐八月乙丑課民種禾及蕝九月丙午端明殿學士左散騎常侍王朴為尚書戶部侍郎樞密副使冬十月辛酉葬宣懿皇后于懿陵十一月庚寅廢諸祠不在祀典者乙巳殺李景之臣孫晟

書殺景臣而不書晟死蓋已深罪周殺忠臣則晟之死節自著

四年春正月己丑朔赦非死罪囚二月甲戌王朴留守東京乙亥

南征三月丁未克壽州不書劉仁贍降事見死節傳蓋仁贍實不降故書則自克之爾克者難取之名也壽難取則見仁贍之節若不書死之者仁贍

自以病死以其守節至死故列之死節傳夏四月己巳至自壽州己卯放降卒八百歸于蜀癸

未追冊彭城郡夫人劉氏為皇后五月丙申殺密州防禦使侯希

進秋八月乙亥李穀罷王朴為樞密使癸未蜀人來歸我濮州刺

史胡立冬十月己巳王朴留守東京三司使張美為大內都點檢

壬申南征十二月乙卯泗州守將范再遇叛于唐以其州來降庚

申濠州團練使郭廷謂以其州來降身居其地而來降者書附再遇廷謂雖以地降既降而不居其地故不書附而書降廷謂

不書叛事見南唐世家丁丑取泰州

五年春正月丁亥取海州壬辰取靜海軍丁未克楚州守將張彥

卿鄭昭業死之自四年十二月辛酉攻之彥卿等堅守四十餘日乃克之其不走不降可知故子其死本紀書死者十餘人宋令詢及李遐彥卿昭業皆以事跡不

完不能立傳然所貴者死
爾本紀著其大節可矣

五代史卷十二

二月甲寅取雄州丁卯如揚州癸酉如瓜州三月

壬午朔如泰州丁亥復如揚州辛卯幸迎鑾己亥克淮南十有四
州以江為界并前所得通十四州耳三月辛亥李景來買宴夏四月庚申

未放降卒四千六百于唐秋七月乙酉水部員外郎韓彥卿市銅

于高麗丁亥頒均田圖九月占城國王釋利因德縵使蒲訶散來

冬十月丁酉括民租十一月庚戌作通禮正樂十二月丙戌罷州

縣課戶俸戶

六年春正月高麗王昭遣使者來辛酉女真使阿辨來三月己酉

甘州回鶻來獻玉却之庚申王朴薨丙寅宣徽南院使吳延祚留

守東京癸酉停給銅魚甲戌北征是月吳延祚為左驍衛上將軍

樞密使夏四月壬辰取乾寧軍辛丑取益津關以為霸州癸卯取

瓦橋關以為雄州

州縣廢置不書此書重復中國故地世宗下三關瓦橋益津以建州
及見於口湖上置寨故舊史實錄皆闕不書遂不見其取得時日今

五月乙巳朔取瀛州復中國故地甲戌至自雄州六月癸未立皇

后符氏符氏無國爵不曰立符氏為皇后嫌同於不正也蓋其位
先定而後娶故書曰立皇后符氏文理宜然無褒貶也封子宗訓為梁王

宗誼燕國公戊子占城使蒲訶散來己丑范質王溥叅知樞密院

事魏仁浦同中書門下平章事癸巳皇帝崩于滋德殿年二十九

恭皇帝世宗第四子宗訓也世宗即位大臣請封皇子為王世宗

謙抑久之及北取三關遇疾還京師始封宗訓梁王時年七歲

顯德六年六月癸巳世宗崩甲午皇帝即位于柩前癸卯范質為

大行皇帝山陵使翰林學士竇儼為禮儀使兵部尚書張昭為鹵

簿使御史中丞邊歸謹為儀仗使宣徽南院使判開封府事咎居

潤為橋道頓遞使秋七月丁未戶部尚書李濤為山陵副使度支

郎中盧億為判官八月庚寅封弟熙讓為曹王熙謹紀王熙誨斬

顯德六年

壬寅高麗遣使者來九月丙寅左驍衛大將軍戴交使于高麗

冬十一月壬寅葬睿武孝文皇帝于慶陵在鄭川管城縣高麗遣使者來

七年春正月甲辰遜于位

宋興五代之亡所書不同隨事為文爾梁亡見唐之速漢亡見周之遲也唐欺天下以討賊周欺天下以立贊故書梁亡見唐之立速則知其志不在於討賊也漢亡見周之立遲則知其贊者偽也唐亡無難莊宗之統唐已亡矣而明宗又稱唐愍帝之奔唐又亡矣而廢帝又稱唐其亡也不可以屢書故不書也晉亡曰契丹滅晉明言以深戒周曰遜于位遜順也能順乎天命也

嗚呼五代本紀備矣備謂喪亂之事無所不有君臣之際可勝道哉梁之友珪反唐

戕克寧而殺存又從璨則父子骨肉之恩幾何其不絕矣太妃薨

而輟朝立劉氏馮氏為皇后則夫婦之倫幾何其不乖而不至於

禽獸矣寒食野祭而焚紙錢居喪改元而用樂殺馬延及任圜則

禮樂刑政幾何其不壞矣至於賽雷山傳箭而撲馬則中國幾何

其不夷狄矣可謂亂世也歟而世宗區區五六年間取秦隴平淮

右復三關威武之聲震懾夷夏而方內延儒學文章之士考制度

此紙卷九之第壹章也

貞為兵馬都監十一月永靜軍節度使梁漢璋及契丹戰于瀛州

敗績契丹寇鎮定十二月己未杜威軍于中渡壬戌奉國都指揮

使王清及契丹戰常死戰將斃于陣守將斃于城而不書死者以其志未可知也或欲走而不得或欲降而未暇遽以被殺爾若不走不

而死節明者自書死如清是也

午射兔于沙臺壬申張守貞張彥澤以其軍叛降于契丹庚

出帝雖存而晉沙則亡矣故書滅北京師殺開封尹桑維翰契丹滅晉

嗚呼余書封子重貴為鄭王又書追封皇伯敬儒為宋王者豈無

意哉禮兄弟之子猶子也重貴書子可矣敬儒出帝父也書曰皇

伯者何哉出帝立不以正而絕其所生也蓋出帝於高祖得為子

而不得為後者高祖自有子也方高祖疾病抱其子重睿實於馮

道懷中而託之出帝得立邪晉之大臣既違禮廢命而立之以

謂出帝為高祖子則得立為敬儒子則不得立於是深諱其所生

而絕之以欺天下為真。祖子也。禮曰為人後者為其父母服。使高祖無子出帝得為後。立以正則不待絕其所生以為欺也。故余書曰追封皇伯敬儒。宋王者以見其立不以正而滅絕天性。臣其父而爵之以欺天也。

代史第九終

五代史第十三

藝文志
氏國前

嗚呼梁之惡極矣。自其起盜賊至於亡唐。其遺毒流于天下。天下豪傑四面並起。孰不欲戡刃於其胷。然卒不能少挫其鋒。以得志。梁之無敵於天下。可謂虎狼之彊矣。及其敗也。困於一二女子之娛。至於洞胷流腸。剖若羊豕。禍生父子之間。乃知女色之能敗人矣。自古女禍大者亡天下。其次亡家。其次亡身。身苟免矣。猶及其子孫。雖遲速不同。未有無禍者也。然原其本末。始不起於忽微。易坤之初六曰履霜。堅冰至。家人之初九曰閑有家。悔亡。其言至矣。可不戒哉。梁之家事。詩所謂不可道者也。至於唐晉以後。親疎適庶亂矣。作家人傳。

梁家人傳第一

梁太祖母曰文惠皇后王氏。單州單父人也。其生三子。長曰廣王。

全昱次曰朗王存其次太祖后少寡撫其三子傭食蕭縣人劉崇家太祖壯而無賴縣中皆厭苦之崇患太祖慵惰不作業數加笞責獨崇母憐之時時自爲櫛沐戒家人曰朱三非常人也宜善遇之黃巢起太祖與存俱亡爲盜從巢攻廣州存戰死居數歲太祖背巢降唐反以破巢遂鎮宣武乃遣人以車馬之蕭縣迎后於崇家使者至門后惶恐走避謂劉氏曰朱三落魄無行作賊死矣何以至此邪使者具道太祖所以然后乃驚喜泣下與崇母俱載以歸封晉國太夫人太祖置酒太夫人前舉觴爲壽歡甚太祖啓曰朱五經平生讀書不登一第有子爲節度使無奈於先人矣后惻然良久曰汝能至此可謂英特然行義未必如先人也太祖莫知其故后曰朱二與汝俱從黃巢獨死蠻嶺其孤皆在午溝汝今富貴獨不念之乎太祖泣涕謝罪乃悉召存諸子以歸太祖剛暴多

殺戮后每誠之多賴以全活大順二年秋后疾上者曰宜還故鄉乃歸卒於午溝太祖卽位立四廟追尊皇考爲文穆皇帝后曰文惠皇后太祖元貞皇后張氏單州碭山縣渠亭里富家子也太祖少以婦聘之生末帝太祖貴封魏國夫人后賢明精悍動有禮法雖太祖剛暴亦嘗畏之太祖每以外事訪之后言多中太祖時時暴怒殺戮后嘗救護人賴以獲全太祖嘗出兵行至中途后意以爲不然馳一介召之如期而至柳王友裕攻徐州破朱瑾於石佛山瑾走友裕不追太祖大怒奪其兵友裕惶恐與數騎亡山中久之自匿於廣王后陰使人教友裕脫身自歸友裕晨馳入見太祖拜伏庭中泣涕請死太祖怒甚使左右捧出將斬之后聞之不及履走庭中持友裕泣曰汝束身歸罪豈不欲明非反乎太祖意解乃免太祖已破朱瑾納其妻以歸后迎太祖於封丘太祖告之后

遠見瑾妻瑾妻再拜后亦拜悽然泣下曰充郵與司空同姓之國
昆仲之間以小故興干戈而使吾奴至此若不幸汴州失守妾亦
如此矣言已又泣太祖為之感動乃送瑾妻為尼后常給其衣食
司空太祖時檢校官也天福元年后以疾卒太祖即位追冊為賢
妃初葬開封縣潤色鄉末帝立追謚曰元貞皇太后祔于宣陵后
已死太祖始為荒淫卒以及禍云

開平三年

昭儀陳氏宋州人也少以色進太祖已貴嬪妾數百而昭儀專寵
太祖嘗疾昭儀與尼數十人晝夜為佛法未嘗少懈太祖以為愛
已尤寵之開平三年度為尼居宋州佛寺
昭容李氏亦以色進尤謹愿未嘗去左右太祖病晝寢方寐忽棟
折獨李氏侍側遽牽太祖衣太祖驚走棟折寢上太祖德之拜昭
容皆不知其所終

貞明下脫五字

末帝德妃張氏其父歸霸事太祖為梁功臣帝為王時以婦聘之
帝即位將冊妃為后妃請待帝郊天而帝卒不得郊貞明年妃病
甚帝遽冊為德妃其夕薨年二十四

次妃郭氏父歸厚事梁為登州刺史妃少以色進梁亡莊宗入宮
梁故妃妾皆號泣迎拜賀王友雍妃石氏有色莊宗召之石氏慢
罵莊宗殺之次以召妃妃懼而聽命已而度為尼賜名誓正居于
洛陽初莊宗之入汴也末帝登建國樓謂控鶴指揮使皇甫麟曰
晉吾世讐也不可俟彼刀鋸卿可盡我命無使我落讎人之手麟
與帝相持慟哭是夕進刃於帝麟亦自剄莊宗入汴命河南張全
義葬其尸藏其首於太社晉天福三年詔太社先藏罪人首級許
親屬收葬乃出末帝首遣右衛將軍安崇阮與妃同葬之妃卒洛
陽

晉天福三年

太祖二兄曰全昱曰存八子長曰友裕次曰友珪友璋友貞友雍
友徽友孜其一養子曰友文開平元年五月乙酉封友文爲博王
友珪郢王友璋福王友貞均王友雍賀王友徽建王友裕前卽位
卒追封郴王而康王友孜末帝卽位封友璋初爲壽州團練使押
左右番殿直監豐德庫友珪時爲鄆州留後末帝時爲忠武軍節
度使徙鎮武寧及友雍友徽皆不知其所終

廣王全昱太祖卽位封太祖與仲兒存俱亡爲盜全昱獨與其母
猶寄食劉崇家太祖已貴乃與其母俱歸宣武領嶺南西道節度
使以太師致仕太祖將受禪有司備禮前殿全昱視之顧太祖曰
朱三爾作得否太祖燕居宮中與諸王飲博全昱酒酣取骰子擊
盆而迸之呼太祖曰朱三爾碭山一百姓遭逢天子用汝爲四鎮
節度使於汝何負而滅唐家三百年社稷吾將見汝赤其族矣安

乾明元年

貞明年

貞明四年

用博爲太祖不悅罷會全昱亦不樂在京師常居碭山故里三子
皆封王友諒衡王友能惠王友誨邵王乾化元年升宋州爲宣武
軍以友諒爲節度使友諒進瑞麥一莖三穗太祖怒曰今年宋州
大水何用此爲乃罷友諒居京師太祖卧病全昱來視疾與太祖
相持慟哭太祖爲釋友諒使與東歸貞明二年全昱以疾薨徙衡
王友諒嗣封廣王友能爲宋滑二州留後陳州刺史所至爲不法
姦人多依倚之而陳俗好淫祠左道其學佛者自立一法號曰上
乘晝伏夜聚男女雜亂妖人毋乙董乙聚衆稱天子建置官屬友
能初縱之乙等攻劫州縣末帝發兵擊滅之自康王友孜謀反伏
誅末帝始疎斥宗室宗室皆反仄貞明四年友能以陳州兵反犯
京師至陳留兵敗還走陳州後數月降末帝赦之降爲房陵侯友
誨爲陝州節度使欲以州兵爲亂末帝召還京師與友諒友能皆

被幽囚梁亡莊宗入汴皆見殺朗王存初與太祖俱從黃巢攻廣
州存戰死存子友寧友倫友寧字安仁幼聰敏喜愠不形于色太
祖以爲軍校善用弓劍遷衙內制勝都指揮使龔州刺史太祖圍
鳳翔遣友寧東備宣武王師範襲梁圍齊州友寧引兵擊之奪馬
千匹斬首數千級太祖奉昭宗還京師拜友寧建武軍節度使賜
號迎鑾毅勇功臣太祖復遣攻師範圍博昌屠之清河爲之不流
戰于石樓兵敗友寧墜馬見殺友倫幼亦明敏通論語小學曉音
律存已死太祖以友倫爲元從馬軍指揮使表右威武將軍燕人
攻魏內黃友倫以前鋒夜渡河奪馬千匹李罕之以潞州降梁晉
人攻潞友倫以兵入潞州取罕之以歸累遷檢校司空領滕州刺
史太祖圍鳳翔晉人襲梁友倫以兵三萬至礬山晉人乃却友倫
西會太祖於鳳翔昭宗還長安拜友倫寧遠軍節度使太祖東歸

留友倫宿衛伺察昭宗所爲友倫擊鞠墜馬死太祖大怒以兵七
萬至河中昭宗涕泣不知所爲將奔太原不果宰相崔胤遣人止
太祖太祖以爲友倫胤等殺之奏請誅胤等昭宗未從乃遣友諒
至京師以兵圍開化坊殺胤及京兆尹鄭元規皇城使王建勳飛
龍使陳班閣門使王建襲客省使王建又前左僕射張濬太祖卽
位已封宗室中書上議故皇兄存皇姪建武軍節度使友寧寧遠
軍節度使友倫皆當封於是追封存朗王友寧安王友倫密王柳
王友裕字端夫幼善騎射從太祖征伐能以寬厚得士卒心太祖
與晉圍黃鄴於西華鄴卒荷稍登城罵敵晉王使胡騎連射不能
中太祖顧友裕一發中之軍中皆大譁呼晉王喜遣友裕良弓百
矢太祖鎮宣武以爲衙內都指揮使景福元年太祖攻鄆友裕以
先鋒次斗門鄆兵夜擊之友裕敗走太祖從後來不知友裕之敗

也前軍遇敵多死太祖至村落間始與友裕相得是時朱宣在濮
 州太祖乃遣友裕先以二百騎前太祖後至與友裕相失太祖卒
 與敵遇敗而走敵兵追之甚急前至大溝幾不免賴溝中有積薪
 馬乃得過梁將李璠等死者十餘人冬友裕取濮州遂圍時溥於
 徐州朱瑾以兵二萬救溥友裕敗瑾于石佛山瑾走都虞侯朱友
 恭讒之太祖以為瑾可追而友裕不追太祖大怒奪其兵屬龐師
 古以友裕屬吏使者誤致書於友裕友裕惶恐不知所為賴張皇
 后教之得免權知許州許州近蔡苦於大寇居民殘破友裕招撫
 流散增戶三萬餘遷諸軍都指揮使與平充邠還領許州崔洪奔
 淮南友裕引兵定蔡州市不易肆太祖兼鎮護國軍以友裕為留
 後遷忠武軍節度使太祖攻鳳翔未下去攻邠州友裕破靈臺良
 原下隴州楊崇本以邠州降後崇本復叛太祖遣友裕攻之屯于

永壽友裕以疾卒

博王友文字德明本姓康名勤幼美風姿好學善談論頗能為詩
 太祖養以為子太祖領四鎮以友文為度支鹽鐵制置使太祖用
 兵四方友文征賦聚歛以供軍費太祖即位以故所領宣武宣義
 天平護國四鎮征賦置建昌宮總之以友文為使封博王太祖幸
 西都友文留守東京庶人友珪者太祖初鎮宣武畧地宋亳間與
 逆旅婦人野合而生也長而辯黠多智博王友文多材藝太祖愛
 之而年又長太祖即位嫡嗣未立心嘗屬友文太祖自張皇后崩
 無繼室諸子在鎮皆邀其婦人侍友文妻王氏有色尤寵之太祖
 病久王氏與友珪妻張氏嘗專房侍疾太祖病少間謂王氏曰吾
 知終不起汝之東都召友文來吾與之決蓋心欲以後事屬之乃
 謂敬翔曰友珪可與一郡趣使之任乃以友珪為萊州刺史太祖

太祖紀晉郭珪

素剛暴既病而喜怒難測是時左降者必有後命友珪大懼其妻張氏曰官家以傳國寶與王氏使如東都召友文君今受禍矣夫婦相對而泣左右勸友珪曰事急計生何不早自為圖友珪乃易服微行入左龍虎軍見統軍韓勅計事勅夜以牙兵五百隨友珪雜控鶴衛士而入夜三鼓斬關入萬春門至寢中侍疾者皆走太祖惶駭起呼曰我疑此賊久矣恨不早殺之逆賊恐殺父乎友珪親吏馮廷諤以劔犯太祖太祖旋柱而走劔擊柱者三太祖憊仆于牀廷諤以劔中之洞其腹腸胃皆流友珪以裊褥裹之瘞之寢中秘喪四日乃出府庫大資羣臣及諸軍遣受旨丁昭浦矯詔馳至東都殺友文又下詔曰朕艱難創業踰三十年託于人上忽焉六載中外協力期于小康豈意友文陰畜異圖將行大逆昨二日夜甲士突入大內賴郢王友珪忠孝領兵勦戮保全朕躬然而疾

乾化二年

三年




貞明元年

恙震驚彌所危殆友珪克平兇逆厥功靡倫宜委權主軍國然後發喪乾化二年六月既望友珪於柩前即皇帝位拜韓勅忠武軍節度使以末帝為汴州留後河中朱友謙為中書令友謙不受命而懷州龍驤軍三千劫其將劉重霸據懷州自言討賊三年正月友珪祀天於洛陽南郊改元曰鳳曆太祖外孫袁象先與駙馬都尉趙巖等謀與末帝討賊二月象先以禁兵入宮友珪與妻張氏趨北垣樓下將踰城以走不果使馮廷諤進刃其妻及已廷諤亦自殺末帝即位復友文官爵廢友珪為庶人康王友孜目重瞳子嘗竊自負以為當為天子貞明元年末帝德妃薨將葬友孜使刺客夜入寢中末帝方寐夢人害已既寤聞榻上寶劔鎗然有聲躍起抽劔曰將有變邪乃索寢中得刺客手殺之遂誅友孜明日謂趙巖張漢傑曰幾與卿輩不相見由此遂踈

弱宗室而信任趙張以至於敗云

嗚呼春秋之法是非與奪之際難矣哉或問梁太祖以臣弑君友
珪以子弑父一也與弑卽位踰年改元春秋之法皆以君書而友
珪不得列于本紀何也且父子之惡均而奪其子是與其父也豈
春秋之旨哉予應之曰梁事著矣其父之惡不待與奪其子而後
彰然末帝之志不可以不伸也春秋之法君弑而賊不討者國之
臣子任其責予於友珪之事所以伸討賊者之志也

五代史第十三終



五代史第十三終

